

## L'I ENGGE PA-PALARA-NA JOANE

### Larana na Li'i adekewe dadi ata

**1:1** Ne kapu'u-nawe wa'ini na Li'i, mòno na Li'i mbàra-nani 'jAla, mòno 'jAlawa na Li'i. **2** Kapu'u-nawe Nia-dona ane'ena mbàrana 'jAla. **3** Nia nia ka nadadi-we ngara-nduka ndèkana; nia ka ngara hèti adadi baa nda'iki ia adadi panda padana-na Nia. **4** Na Nia pandou-nawe toleka, nia ka ne toleka awànggara-we pa-mangewala dèngana atapi'a. **5** Nia ka na awànggara na-wànggara kapòta dana, tàka ne kapòta nda nadeimba-kiwa. **6** Ka àmeni aia ata pa-patuka-na 'jAla, Joane-we ngarana. **7** Mainawe pa-zàkita, ka na-zàkita-ni na awànggara, ngga'i ngara ata ka napawai orona nia. **8** Nda niaki nia Na awànggara, nia-kidowe ka zàkita-ngge larana na awànggara, ba trina. **9** Na awànggara pòngu tàka, a-pa-mangewala-wa ia ata ia ata, àme baani pònu tanangge. **10** Wa'i baani pònu tana, Nia nia ka nadadi-we iinawe pònu tana, tàka na ata pònu tana ndaa pànde-kini. **11** Mainawe mbàrada douna, tàka hida douna ndaa deimba-kiwa. **12** Tàka ngara adeimbawa, na-keketa-wi kaa ndoungge pandou paana 'jAla, nàme awainawe ngarana. **13** Ne dadida inda wali ra'a-kiwe, inda wali-kinawe patèki dadi ata, inda wali-kinawe pambei kabani, tàka awali-nawe 'jAla. **14** Nia ka na Li'i ka nadeke-we dadi ata mòno nandou wa'i tilunda, mòno ma-pazèra baanawe mbotona ahinana mbotona ana akanua dadi, awali àme mbàrana 'jAma, ba nduka ndua nduka biawa. **15** Na Joane nia azàkita-nawe larana ba naai pa-kawaro: Na Nia-dona patèki-ngguna: Nàme aàmena liranggu naulu-pongga zaua, màla ba lènga wa'i ulu-duni Nia wudi zaua pa-lungguna, ba hina. **16** Màla wali mbàrana Nia ambabu mbajo, nia ka takole ndòba-kona, niawe andua pàndo andua. **17** Mala ne li'i uku nia Mjuza atangungge jaawe, tàka ne andua mòno ne abia oro Jezu Karetu-we nia ka nadadi-we. **18** Nda ndòko-kipona ia ata ba naeta-wa 'jAla; na Paana akanua dadi, ane'ena tidina 'jAma, Nia atèki baawa.

### Lara zàkita-nawe Joane tutu douna

**19** Ka ne niawe pa-zàkita-na Joane, hida ata Jawundi ane'ena Jeruzale baa patuka-nandi rato2 mòno ata Lewi laa patua-wa; Nggàranggu limi-nawe ba hidandi. **20** Natèki-dawe apia, nda nakede-kidawe; ne hinawe papia-na: Ne zaua nda Karetu-kiwangga, hina. **21** Nia kaa tuawa: Ka àpawu ne wo'u? 'jElia-wu? Indaki, hina. Wo'u ne nambi pa-hidana? hidani. Indaki, hina ba nawale. **22** Ka nggàranggu ne wo'u? Ngga'i ka mapànde pawale-wi hidime ata apatuka-nggama. Ka àpa lumungge ne wèki doumu? hidani. **23** Taunawe: Zaua ne li'ina na'i akawuula ne'e marèda kikapa pa-kindola-wa larana Mjori ahina, dekungge patèki-na nambi Jazaja nàtina. **24** Nia ka wa'i dòmona pa-patuka-na ata Parizi. **25** Nia kaa tuawa: Ne ba hina-dowe, àpa kau pariwo-wa, ba nda Karetu-duwu, mòno ba nda Elia-duwu mòno ba nda nambi-duwu nàtina? hidani. **26** Pawale-nandi Joane: Ne zaua we'ewe pawainggu ba ku-pariwo, tàka ne tilumi wa'ini andende, panda papànde-mi, **27** amai liranggu nème-langge; ne lèndaka-nandi kalère kàpe wa'ina, nda kunggàpo-ki ne zaua, hina. **28** Ngara ne, ne'e Mbaitani mbali loko Jarandena padadi wa'i-nawe, pandou kàli pariwo wa'ina Joane.

### Pa-zàkita-na Joane larana Maròmba Jezu

**29** Nakoka-nggengge ka naeta-wa Jezu ba àmeni mbàrana, ka hinangge: Patete-ni Ana mbembena 'jAla akoutawi zalana ata pònu tana. **30** Na nia-dona: Àmeni liranggu nàme-langge aulupo mòno zaua, mala ba wa'i ulu-duni Nia wudi zaua, pa-lungguna. **31** Hèti, zaua kainana nda kupànde-kini, tàka ka bowo-dani ata Izaraila ba binawe, niawe nia ka àmengga apariwo waina we'e, hina. **32** Ne hinawe pa-zàkita-na Joane: Kueta baawa Ngjau ba namburu wali ljangita, napanggai takukuna, ka engani wèki detana. **33** Ne zaua nda kupànde kaikini, tàka na Apatuka-ngga pariwo waina we'e, Nia atèki baanggawe: Na paeta-mu pandou mburu wa'ina Ngjau, mòno ka engani mbàrana, Nia-dona apariwo waini Ngjau Matua, hinangge. **34** Kueta baawa mòno ku-zàkita baanawe Name ba Ana-nani 'jAla, hinangge.

### Kawunga pendena ana panunga Maròmba Jezu

**35** Nakoka-nggengge ka zulu ne'eni Joane mòno aduada ana panunga-na olena. **36** Ne ba naeta-wa Jezu ba nakako ka hinangge: Patjete-ni nati Ana mbembena 'jAla hina. **37** Nia ka hida ana panunga-na aduada kaa rèngewe ne patèki-na ahinana, ka nètindi adekuni Jezu. **38** Nia ka winggiru hina Jezu; ba naeta-wi baa dekuni: Àpa pawewa-mi? ka hinandi. Nia ka hidangge baa wale: Rabbi, ba palali-kowe: Ngguru binawe, nggjeengge pa-mandaka wa'imu? hida. **39** Nia ka hina-dawe: Mjai kai etawe, hina. Ka nètindi nia kaa etawe ne pandou mandaka wa'ina, ka engandi mbàrana ne lòdo. Wa'i ndjamu kambulu ne ba hinawe. **40** Hida aduada arènge-nawe patèki-na Joane mòno adekuni Jezu, na aia 'jAndaria-wa, angu wuana Zimo Petura. **41** Na 'jAndaria naduki uluni angu wuana, ka ngu hina-nawe: Ma-patàboka dènga baani Mazia, ba palali-kowe Karetu binawe, hina. **42** Nia ka nakondo-ni mbàrana Jezu. Ka na Jezu ka na-pazèra-ni, nia ka: Ne wo'u Zimowu, anana Joane; Kepa ka hida-ngguwe ngara-mulangge, ba palali-kowe Petura, hinawe. **43** Nakoka-nggengge, kako Nggalelea hina Jezu, nia ka na-patàboka dèngani Paliputa. Dekungga, ka hina-nawe. **44** Na Paliputa, ata Mbaitazainda-wa, ole wàno-dani 'jAndaria baada Pjetura. **45** Baangge na Paliputa ka naduki-ni Njatanela, ka hina-nawe: Nàti palara liina Mjuza zurata uku dana, mòno hèti nambi, ma-patàboka dènga baani: Nia-dona Jezu, anana Jozepa ata Nazareta, hina. **46** Ka taunawe Njatanela: Na-mapànde-kadowe ne Nazareta ba na-patimbu-ngge andua? hinani. Ka taunawe Paliputa: Umaiwu, kau età, hinani. **47** Nia ka na Jezu ba naeta-wa Njatanela ba àmeni mbàrana: Patete-kuni, name ata Izaraila ta-tàka, ndaa màngu wini atena, hina-nawe larana. **48** Ka taunawe nia Njatanela: Peinawe kau ngu pànde-kongga? hina-nawe. Nia ka: Ne ba nda napamai-puwu Paliputa ne ba ne'enggu pu'u kapulota, kueta baawu, hinangge Jezu ba nawale-wa. **49** Nia ka nawale-wa Njatanela: Ngguru, ne Wo'u Ana-nanggu 'jAla, Zangandi-nanggu ata Izaraila, hina-nawe. **50** Ka taunawe Jezu: Kueta baawu ba ne'enggu pu'u kapulota ba lènga lunggunggu, niawe nia kau pawai? Enga eta-dumuwe aàti kiapo-na mòno ne, hinani. **51** Ka hina dòmo-nawe: Lunggu tàka-nggumiwe, enga eta-dumiwe langita ba na-mawuke-we, mòno papalewa-na 'jAla baa pène mburuni Ana Atapi'a-langge, hina.

## Rame pa-umana ana ne'e wàno Kana

**2:1** Ne pa-katòlu lòdo wainawe, wa'ingge rame pa-umana ana ne'e wàno Kana, Nggalelea dana, ka wa'ini inana Jesu ne'e. **2** Nia ka na Jesu mòno ana panunga-na, awèna kaina bowo padana-ngge ne rame. **3** Ne ba nandàpu-ndi we'e anggura-ngge, ka taunawe inana Jesu: Nda'i baa we'e anggura-ngge, hinani. **4** Ka taunawe Jesu: Ee paina, àpanda baanda ne nia? Nda natutu-kipowe rapanggu, hinani. **5** Nia ka na inana ka hinandi hida pa-pawende: Ba àpa-kowe patèki-nanggumi-langge, kai dekungge, hinandi. **6** Nia ka wa'indi ne'e aène pandalu watu pata'ida, dekungge pata pa-zingira-da ata Jawundi, ia pandalu ia pandalu awèna duada bàka touda wiro we'e kalada. **7** Taundi we'e hida pandalu, hinandi Jesu. Nia kaa pa-manànara-ndi baa taundi we'e. **8** Nia ka hina-dawe: Nditawe ne ba hinawe, kai ngindi-nawe na'i akatowa-ngge rame, hina. Nia kaa ngindiwe. **9** Ne ba nanunga paenu-ngge ne we'e akabali anggura na katowa rame — nda napànde-kingge baa nggjee pawali-nawe, tàka hida pa-pawende anditawe hida apàndengge — ka napamai-wa na kabani: **10** Kàli patawe ia ata ia ata, ba na-pakako uluwe we'e anggura andua; baa, ba na-lèngana pakole oro pi'ana ata paenu, ka ne ndaa ndua béri ate. Tàka ne wo'u mubèli-wawe ne andua làpata ne ba hinawe, hinani. **11** Ne kawunga-da tanda parawi-na Jesu, narawi wa'ingge ne'e wàno Kana tana Nggalelea; bowo-nawe mbotona, nia ka hida ana panunga-na kaa waini. **12** Baanangge ka nandodo àti Jesu pàngu inana pàngu angu wuana pàngu ana panunga-na Kapenau; wa'i pira lòdo-kidoda ba engandi ne'e.

## Ba na-pamatua-we uma Ala Maròmba Jesu

**13** Ne lòdo Pazana ata Jawundi na-dànggeta-we, nia ka nètini Jesu a-katekala Jeruzale. **14** Nia ka ne'e uma Ala ka naduki-ndi ata abàta wa'ina zape, mbembe, takuku mòno ata azepa òma. **15** Nia ka na-rawina mbole kalère, ka natòmba wai ndòbandi wali uma Ala, pàngu mbembe pàngu zape, mòno na-zaikara-ndi òmada ata amazepa, mòno ka na-pakataba-dandi meindada; **16** ka hinandi ata abàtana takuku: Ngindiwi

hida pawai wali wa'i nèwe, ne umana Amanggu ndai panggjai-kangge pa-rènggana, hina. **17** Nia kaa lolowe ana panunga-na ba wa'ingge Zurata dana: Ne lumu-ngguwe umamu nia apameita-wangga-langge, ahina. **18** Nia ka pakède-da ata Jawundi: Àpa tanda-kowe pabowo-munggama nia ka lumungge ne? hidani Jezu. **19** Nia ka: Konggara-ngge ne uma Ala, ne atòlu lòdona ka ku-pakède baliwe, hinandi Jezu ba nawale-wi. **20** Ka taudawe ata Jawundi: Pata kambulu ène ndounawe mando'i-na baa pakède-we ne uma Ala, mòno mu-pakède baliwe ne atòlu lòdona ne Wo'u? hidani. **21** Tàka ne uma Ala patèki-na Nia niawe tou douna. **22** Ba na-lèngana pakède bali wali tilu ata mate, nia kaa lolowe ana panunga-na, ba natèki baawe ne ahinana, nia kaa wadngge ne Zurata mòno ne li'i patèki-na Jezu. **23** Ne ba ne'eni Jezu Jeruzale ne lòdo rame Paza, na-luana ata awainawe ngarana, oro-nawe baa eta-nandi tanda parawi-na. **24** Tàka na Jezu nda na-pamène wèki-kina mbàrada, eka-powe ba nda napànde ndòbandi. **25** Ba Nia-dona nia, nda pazulu tèki baanawe pata atapi'a, mala ba napànde doudongge atena ata.

### Ba na-panewe dèngani Nikondemu Maròmba Jezu

**3:1** Wa'ini aia ata oleda ata Parizi angarana Nikondemu, ata mètoda ata Jawundi. **2** Nia amai waingge nggède mbàrana Jezu: Mapànde-nggu Ngguru, ba Ngguru wali 'jAlawu, mala ba nda'i awa ia ata apànde parawi-ndi hèti tanda parawi-mu Wo'u, ba nda Niako 'jAla azangera-wa, hinani. **3** Nia ka nawale-we Jezu: Lunggu tàkanggu, nda na-mapànde-kiwe ia ata ba naeta-we zangandi-na 'jAla ba ndaa pàndo paana-kuni, hinani. **4** Nia ka taunawe Nikondemu: Pei pata mapànde-konawe na ata baa paana-ni ba na-lèngana pa-kaweda baa? Na-mapànde-kadowe ba napàndo tama ti'a danana inana baa kaa paana pi'ani? hinani. **5** Nawale-we Jezu: Lunggu tàkanggu, ba ndaa paana-kuni oro we'e mòno Ngjau, nda na-mapànde-kiwe ia ata ba natama-ngge zangandi-na 'jAla. **6** Na pa-paana oro dadi ata na-papata dadi atana, tàka na pa-paana orona Ngjau na-papata Ngauna. **7** Ndau karòba ate dènga-kangge ne: Enga nia-pongge baa pàndo paana-nggumi ba lunggunggu. **8** Na paringi na-mapuputa mèli hètiko paaro

àtina, ne kambuuka-na urènge-we, tàka ndau pànde-kingge ba nggjeekongge pawali-na mòno ba nggjeekongge paaro àtina. Hina wa'i kaina ia ata ia ata pa-paana oro Ngjau, hina. **9** Ka pakède-nawe Nikondemu: Pei pata mapànde-konawe ne ahinana? hinani. **10** Nawale-we Jezu: Wo'u ne ngguru ata Izaraila-wu mòno ne ahinana ndau pànde-kingge? **11** Lunggu tàkanggu, ne papànde-ma niawe patèki-ma, mòno ne paeta baama niawe pa-zàkita-ma, tàka ne pa-zàkita-ma ndai deimba-kiwe. **12** Ne ba kutèki-nggumiwe lara-nawe nèwe pònu tana ba ndai wai baadongge, ka nia kiawa-we bai zulu waingge ba kutèki-nggumiwe lara-nawe nème zòrongga dana? **13** Mòno nda'iki apène baa zòrongga dana, nia wai-kidona amburu baa wali nème zòrongga dana, na Ana atapi'a. **14** Ahinana Mjuza ba na-keketa-wa na kaboko ne'e marèda kikapa, enga hina kaipowe baa keketa-wa Ana atapi'a-langge, **15** ngga'i ia ata ia ata apawai ka nadoungge toleka ndaa mbiata orona Nia. **16** Ba lènga hinawe pata manàwara-nawe nèwe pònu tana 'jAla ka zupu jaanani na Ana kanua-na, ngga'i ia ata ia ata awai wa'ini Nia, ka nda karei-kanani, tàka ka nadoungge toleka ndaa mbiata. **17** Mala pazupu patuka dènga-nani Anana 'jAla, ngga'i ka nataungge zala ne pònu tana inda hina-kiwe, tàka ne pònu tana ngga'i ka nakole dèngangge mánango orona Nia, hinangge. **18** Na awai wa'ini Nia nda patau-kiwa zala, tàka na ndaa pawai patau baawa zala. oro-nawe ba nda nawai wa'ingge ngarana Ana kanua-na 'jAla. **19** Ka ne hinawe pata tauna zala: Na awanggara naduki baa neti pònu tana, tàka na atapi'a nalouka pambeingge a-kapòtana inda pi'a ne awanggara, oro-nawe ba na-diraka-we lara paliida. **20** Mala ia ata ia ata aliiwe adiraka, nambutu-ngge ate awanggara mòno nda natuke-ki mbàrana awanggara, ngga'i ka ndaa ounda-kana lara paliina. **21** Tàka na aliiwe ne abia, enga tuke-nani awanggara, ngga'i ka naounda dènga waingge, ba kàza Nia 'jAla ba naliwi lara paliina, hina.

### [Kanduka zàkita-nawe Joane Pariwo larana Maròmba Jezu](#)

**22** Baanangge ka nètini Jezu hèti tana Jundea, ka na-mando'i zodi nème pàngu ana panunga-na ka na-pariwo wa'i. **23** Ka na Joane ne'e kaini



apariwo ne'e Ainongo mbàra Zalingo, oro-nawe ba na-pawe'e pòngungge ne'e; ka àmeni ata ka na-pariwo-wi. **24** Mala na Joane ba ndaa patama-puduni nggòlu dana. **25** Nia ka nakède-we parika dènga-dani ana panunga-na Joane na aia ata Jawundi, lara-nawe pata pa-zingira. **26** Nia ka nètindi mbàrana Joane ka hida-nawe: Ngguru, nàti ata awa'i-kona mbàramu ne'e mbali loko Jarandena-na, pa-zàkita-kumu, ne'e baani na'i apariwo ata, mòno nèti mboloni ata mbàrana, hida. **27** Nia ka hinangge Joane ba nawale-we: Nda na-mapànde-kiwt atapi'a ba nadeke àpa-àpa, ba ndaa jaa-konawe wali zòrongga dana. **28** Jèmi douna zjàkita-ngge: Ne zaua nda Karetu-kiwangga, tàka pa-patuka-dangga paulu-ni Nia, ba lunggu-wanggana. **29** Na atutuni na mawine, nia-dona na kabani. Tàka na ole' atena na kabani ane'ena mbàrana mòno arèngewa, nduka ndeta atewa ba narènge-nawe li'ina na kabani. Ne ba hinawe, na-tonggola baawe ndeta atenggu nengge. **30** Ne Nia enga deta-deta-pona, ne zaua enga tarèda-rèda-punggu. **31** Na awalina bjondo na-rèdeta mbolondi. Na awalina pònu tana, pònu tanawe pandouna mòno na-papata pònu tanangge patèki-na. Na awalina zòrongga dana na-rèdeta mbo-mbolondi. **32** Ne paeta-na mòno ne parènge-na niawe pa-zàkita-na, tàka nda'iki adeimba-nawe pa-zàkita-na. **33** Ba nggàra-kuni adeimba-nawe pa-zàkita-na, patena-nawe ba nabia 'jAlangge. **34** Mala na pa-patuka-na 'jAla ba nia-dowe li'ina 'jAla patèki-na; mala ba nda na-katutu-dowe ba najaawa Ngjau. **35** Na 'jAma na-manàwara-ni na Paana mòno najaa-nandi lima danana ngara-nduka tèngana. **36** Ba nggàra-kuni awai wa'ini na Paana nadoungge toleka ndaa mbiata, tàka ba nggàra-kuni ndaa pato'o-wa na Paana nda naeta-kiwe ne toleka-langge, tàka ne mbutu atena 'jAla enga paki-kitangge wèki deta-nalangge, hina.

### Ba na-panewe dèngani na aia mawine Zamaria Maròmba Jezu

**4:1** Ba na-lèngana papànde-ngge Jezu baa rèngewe ata Parizi, ba nareiwi ana panunga pakole-na mòno pa-pariwo-na Jezu inda pi'a Joane, **2** — ne nia inda Nia doukina Jezu apariwo, tàka hida ana panunga-na — **3** nia ka na-dundaka-ngge tana Jundea ka nazulu bali hèti Nggalelea. **4** Enga pala

lì-ponawe tana Zamaria. **5** Nia ka naduki-ngge ne ambàno wàno tana Zamaria, Zikara pa-hidana, ngàmbe-nawe ne tana pajaa-kona nàti Jakupa mbàrana Juzupa, anana, hètina. **6** Ka ne'e wa'ingge mata we'ena Jakupa. Ne ba na-ondana nème lara danangge ka nangu mandi'i mbàra-nawe ne mata we'e. Notongge ndindara lòdowe. **7** Ka àmeni aia mawine Zamaria ka kuoke we'e ahina. Tàka na Jezu: Jaaponda ka taenu, hina-nawe. **8** Mala hida ana panunga-na nèti baandi awo'i panga'a wàno dana. **9** Nia ka taunawe na mawine Zamaria: Peina ka nia dèngi-kowa-mungga we'e ba ata Jawundi-wu Wo'u mòno ne zaua ba mawine Zamaria-wangga, hinani. Mala na ata Jawundi ba ndaa pa-nggàmata dènga-duni ata Zamaria. **10** Nia ka nawale-wa Jezu: Bau pànde pia-mongge ne pajaana 'jAla mòno ba nggàrani na: Jaangga ka kuenu, ahinanggu, wo'u adèngiwa Nia, mòno najaa-munggu we'e moripa, hinani. **11** Nia ka taunawe na mawine: Mori, àngu nda'iki paoke waimu kède dòmo na-mandale-ngge ne we'e. Nggjee kole nia-kumuwe ne we'e moripa? **12** Namoda-mowe bau reiwa nàti Jakupa, umbuma, ajaamawe ne we'e; ne nia douna naenu-ngge mòno anana làpata banda rangana, hinani. **13** Ka taunawe Jezu: Ba nggàra-kuni aenungge ne we'e engga dòmo-pongge maro'u-na, **14** tàka ba nggàra-kuni aenungge ne we'e pajaa-ngguni-langge, nda nazulu maro'u pònguki muri wali muri wali-langge. Mala ne we'e pajaa-ngguni ba mata we'e-dowe ne djanana-langge a-patòbula-we moripa ndaa mbiata, hina-nawe. **15** Nia ka taunawe na mawine: Mori, ujaa-kinggawe ne we'e, ngga'i ka nda kuzulu maro'u-kana mòno ka nda kumai-kana nèwe paoke we'e, hinani. **16** Ka hina-nawe Jezu: Ukako kau pamaiwa la'imu, baa ka àmenggu nème, hina. **17** Pawale-na na mawine: Nda'iki la'inggu, hinani. Ka taunawe Jezu: Pia-wanawe ne patèki-mu niangge, nda'iki la'inggu ba lumungga, **18** Mala alima baa la'imu mòno na'i awa'ina mbàramu ne ba binawe inda la'i-kimuni. Abina tàka-nawe ne patèki-mu, hina-nawe. **19** Taunawe na mawine: Arou, Mori, kupànde-nggu ba nambiwu nengge. **20** Hèti umbuma zàmèna anòmba wa'i nèke làdaka detana, tàka.ne patèki-mi jèmi, Jeruzale nia-powe pandou nòmba wa'i, limingge hinani. **21** Ka taunawe Jezu: Ee paina, uwaingga, baalangge engga wa'i-dongge rapana ba nda niawe nèke làdaka detana mòno ba nda nia dòmowe Jeruzale pandou panòmba



wa'i-mini 'jAma. **22** Ne jèmi njòmbawa panda papànde-mi, ne zàme manòmba-wa papànde-ma, mala eka-powe ne mànango ba nda wali-nawe ata Jawundi. **23** Tàka baalangge enga wa'ingge rapana, mòno rapawe ne ba hina-wengge, nàme anòmba pia pòngu tàka, ba napangau-we mòno ba na-mawèna-we ne nòmba-dani 'jAma, mala ekapo na'i 'jAma, hida ata ahinana nòmba-dani, ba nda niawi padèngi-na. **24** Na 'jAla ngauwa nia ka ba nggàra-kuni anòmbawa enga nia-pongge ba napangau-we mòno ba na-mawèna-we nòmba-dani, hinani. **25** Ka taunawe na mawine: Kupànde-ngge ba àmeni Mazia-langge, Karetu pahida-na. Ba àmeni Nia-Iangge natèki ngara-kua-ndandi-langge, hinani. **26** Ka taunawe Jezu: Zaua-dona nèwe andau-ndau dènganggu, hinani. **27** Nia ka ne pahina waini, wa'i baandi awali ana panunga-na, ka ne'endi akaròba oro-nawe ba na-panewe dèngana mawine. Tàka nda'iki: Àpa pakàmbu atemu, bàka: Àpa kau panewe dèngani, ahinani. **28** Nia ka na mawine ka na-dundaka-ni wiro we'ena ka nètini wàno dana. Duki ka hinani ata: **29** Mainda ka taeta-wa na'i ata atèki ku-kua-nggawe lara paliinggu. Àngu Niamo Karetu na'i, hina. **30** Ka nètini ata wjàno alouzo mbàrana Jezu. **31** Nia ka ne pallina waiwe nia ka hida ana panunga-na: Ngguru, mana'a bèliwu, hidani. **32** Nia ka nawale-wi Jezu: Ne Zaua wa'ingge panga'a pa-wukuna panga'a-punggu panda papànde-mi, hina. **33** Ka ne'endi apanewe wèki douna hida ana panunga-na: Àngu nda'i awa angindini panga'a-na? hida. **34** Nia ka taunawe Jezu: Ne ba kuliwe pambeina Na'i apatuka-ngga mòno ba ku-patonggola-nawe pawili-na, niawe ne panga'a-nggu Zaua. **35** Wa'i pata wula kiapo ba makeni, àngu limi-dongge! Lunggu tàka-nggumi, keketa-wi matami, patjete-ndi hidame oma, ba na-maràraka mbolowi, nia-kidowe ba kenindi. **36** Nia ka na amakeni ne'e baani akolena wundana mòno apakua-ndi pakeni-na tutu-nawe toleka ndaa mbiata, ngga'i kaa woro ndeta ate ka niako na a-mazòbara ka niako na amakeni. **37** Ne niawe patena dènga-nawe hèti pakàli tèki: la ata atangu zòbarana, ia ata atangu kenina. **38** Ne Zaua ku-patuka-nggumi kenindi panda pa-mawila dèngami. Ata wàdeka-wa aeta mawila-na, tàka jèmi akolengge iina oro-nawe mawila-da, hina. **39** Na-luana ata Zamaria iina ne wàno awaini Jezu, oro-nawe pa-zàkita-na na mawine, natèki ndòba-nggandi lara paliinggu ba

hina. **40** Baa duki ata Zamaria mbàrana Jezungge, nia kaa dèngiwa, ngga'i ka enga bèli-kinggu mbàrama, hidani. Nia ka dua lòdona ba engani mbàrada. **41** Nia ka àti kia pòngungge mangeda-na ata apawai oro-nawe li'i douna Nia. **42** Nia ka hidani na mawine, inda nia baawe ne patèki-mu nia ka mapawai, mala ba marènge dou baadowa, mòno mapànde-ni, ba Nia tàka pòngu Tjanggu lizuna ata pònu tana.

### Ba na-patàngga-ni anana na apawili mbàra zangandi

**43** Na-mazingga-wi hida adua lòdo-nangge, ka palengge-nawe Jesu wali wa'i ne'e ka hètini Nggalelea. **44** Mala na Jesu douna ba na-zàkita-dongge na aia nambi ba nda'ingge paaka-dani wàno douna. **45** Ne ba naduki Nggalelea-ngge, kaa deimbawa ata Nggalelea ba lènga età baadandi ngara parawi-na nème Jeruzale rame dana. Mala baa dana kaidona rame. **46** Nia ka nazulu mai dòmo ne'e Kjana tana Nggalelea pandou pa-kabali we'e anggura wa'i-konawe ne we'e. Nia ka ne'e Kapenaii wa'ini na aia ata apawili mbàra zangandi\* a-karòduka ana kabani-na. **47** Ne ba narènge-we ba naduki Jesu tana Nggalelea wali Jundea-ngge, ka nètini adukini ka nadèngi-wa: Ngga'i ka àme-kinggu, kau patàngga-nggani na'i ananggu, naaro baangge mate, hinani. **48** Ka taunawe Jesu: Ba ndai etako tanda mòno pa-karòba dènga, ndai pawai, hina-nawe. **49** Nia ka taunawe na ata: Mori, umai-kiwu, toma nda namate-po ananggu, hinani. **50** Ukako-wu, toleka-nawe na'i ana-mungge, hinangge Jesu. Nia ka na ata ka nangu waingge patèki-na Jesu ka nètini akako. **51** Ne ba nème-puni lara dana, ndoli àme baandi atana apatanga dèngani: Na-toleka baa ana-mungge, hidani. **52** Nia ka natua-wi, ba mbee hina lòdo ba nakède. Mànga ndjamu ia tambèkora lòdo ba nalènga-ngge ngàngana, hidani. **53** Ka nangu pànde memangge amana ba nia wai kaiwe, toleka-nawe na'i ana-mungge, ba hinani Jesu. Nia ka napawai, ne nia làpata ngara ole katonga danana. **54** Ne niawe tanda ka-duada-na parawi kiana Jesu, ba naduki Nggalelea wali Jundea.

### Lara pandua-nani aia ata karòduka ba lòdo ngauwe

**5:1** Baanangge wa'ingge lòdo ramena ata Jawundi ka na-katekala Jezu Jeruzale. **2** Nia ka ne'e Jeruzale mbàra Bina Mbembe wa'ingge pandou riwo wa'i alima apina, Mbatenda hinawe ngarana dekungge panewe Imbarani. **3** Ne'e, na-mangeda ata karòduka ambeika wa'i, ahinana ata kabura, ata kaliku, ata amate zapapa, aremangge ndiboka-nawe ne we'e. **4** Mala ba naduki-we rapana ba namburu aia papalewa-na Mjori we'e dana a-pandiboka-ngge ne we'e. Nia ka ba nggàra-kuni aulu pamburu we'e dana, ba na-lèngana pa-ndiboka-we, nangu ndua, làngo ka àpa-kowe karòduka-na. **5** Ka wa'ini ne'e aia ata karòduka, atòlu kambulu pàndo-pata ndou baana ba na-karòduka. **6** Nia ka na Jezu, ba naeta-wa ba ne'eni ambeika ne'e, mòno ba napànde-ngge ba nggai baawe mando'i-nawe karòduka-na, nia ka: Umbei-dongge bau nduawtf? hinani. **7** Ka taunawe na ata karòduka: Nda'iki ata angindi-wangga we'e dana ba na-ndiboka-we. Tàka ba tèngara kako-nggungge ndoli wa'i baa wàdeka aulungga pamburu, hinani. **8** Ka hina-nawe Jezu: Ukède-wu, kau lulundi tèpemu kau kakowu, hinani. **9** Ka ne mema pòngu nangu ndua na ata, ka nalulu-ndi tèpena ka nètini akako. Ne pahina waiwe lòdo ngauwe. **10** Nia ka hida ata Jawundi, ka hidani na ata alèngana pandua: Na'i lòdo lòdo ngauwe, inda pata-kiwe ba ngindiwi hidati tèpemu, hida. **11** Ka taunawe: Nàti apandua-wanggana, Nia: Lulundi tèpemu kau kakowu ahinangga, hinandi. **12** Nia kaa tuawa: Nggàrani nàti ata, lulundi tèpemu kau kakowu ahinanggu, hida. **13** Tàka na ata pa-pandua nda napànde-kini ba nggàrani. Eka-powe ba nda na-mangeru baa Jezu, oro-nawe ba na-mangeda pòngu ata ne'e. **14** Baanangge na Jezu ka na-parèngga dèngani ne'e uma Ala ka hinani: U-màtara pandua-ngge, mundua baa ne ba hinawe, ngga'i ka ndau zulu diraka-kana, ngga'i ka ndau wèna dòmo-kawe alouka kiaki, hina. **15** Ka nètini na atà ka natèki-dawe ata Jawundi ba Nia Jezu apandua-wa. **16** Niawe nia kaa kalemata-wa Jezu ata Jawundi oro-nawe ne ahinana ba narawi waingge lòdo ngau. **17** Tàka pawale-na Jezu: Na'i Amanggu engani apawili làpata ne ba hinawe, ka ne Zaua lunggu kaina ba ku-pawili. **18** Nia ka àti kiangge kalemata-dani ata Jawundi pamate-wa ba hidani, inda nia waikingge ba nalawi-we pata lòdo ngau, tàka oro dòmo-nawe Ama-ngguni na'i 'jAla ba hina, ba na-pamera wèki dèngani 'jAla.

## Ba na-zàkita wèkina Jezu ba Ana-nani 'jAla

**19** Nia ka tau dòmo-nawe Jezu: Lunggu tàka-nggumi, nda na-mapànde-kiwe na Paana ba na-rawina àpa-àpa wali ate douna, nia-podowe ba naeta-wa 'jAma arawingge; mala hida ahinana parawi-na 'jAma, hina wa'i kaina na Paana ba narawi-ndi. **20** Ekapo na'i 'jAma ba nda manàwara-ni na Paana, mòno nabowo-nandi ngara parawi douna, mòno enga àti kiapo-ndi parawi-na pabowo-nani-langge, ngga'i kai mangàdala dèngangge. **21** Mala ahinana 'jAma ba na-pakède-wi ata mate ba na-patoleka-wi, hina wa'i kaina na Paana, ba na-patoleka-wi ngara pa-kalongga atena. **22** Làpata na'i 'jAma ba nda napiata-nawe tutuna ia ata, tàka naaila ndòba baanawe na Paana papiata panewe, **23** ngga'i kaa paaka ndòbani ngara-ndukada na Paana, ahinana baa paaka-ni na'i 'jAma. Ba nggàra-kuni ndaa paaka-ni na Paana, nda na-paaka kaikini na 'jAma apatuka-ni. **24** Lunggu tàka-nggumi, ba nggàra-kuni arèngewe li'inggu mòno awaini na Apatuka-ngga, nadou baangge toleka ndaa mbiata mòno ndaa piata-kinawe tutuna, tàka nandiki baa wali mate dana ne'e toleka dana. **25** Lunggu tàka-nggumi: Àme-dongge rapa-nawe, beengge rapa baanawe ata mate baa rènge-nawe li'ina Anana 'jAla-langge\* mòno hida arènge-nawe li'ina enga toleka-dalangge. **26** Mala ahinana 'jAma ba na-toleka douna, hina kaini na Paana ba najaa-nawe toleka douna. **27** Ka naaila-nawe mboto papiata panewe ba lènga Ana atapi'a-wa, **28** Ndai karòba dènga-kangge ne ahinana, mala ba àme-dongge rapa-nawe ngara ata ane'ena rate dana baa rènge-nawe li'ina, **29** nia kaa kède louzo; ata andua lara paliina akède toleka dana, tàka adiraka lara paliina akède nda kaa taundi zala-langge. **30** Nda na-mapànde-kiwe ne Zaua ba ku-rawina apa2 wali ate dounggu; kudeku-ngge parènge-nggu ne ba kupiata panewet mòno natindi-ngge ne papiata-nggu; mala ba nda nia-awawe pambei dounggu pawewa-nggu, tàka niamo pambeina Nia apatuka-ngga. **31** Ba nia zàkita-kungguwe tutu dounggu, nda ahina tàka-kinawe ne zàkita-nggu. **32** Wa'i ekani azàkita-nggawe tutunggu, mòno kupànde-ngge ne zàkita pa-zàkita-nanggawe tutunggu ba ahina tàka-nawti. **33** Ne jèmi patjuka baana ata mbàrana Joane, nia ka na-zàkita-ngge ne ahina pòngu tàkana. **34**

Ne Zaua nda kudèngi-kinawe zàkita-na atapi'a, tàka patèki dènga-ngguwe ne ahinana, ngga'i kaa mànango lunggu-nggumi. **35** Nàti Joane api iluwa amutuna mòno awenggara, tàka' ne jèmi ne alodo-kina ndeta ate dèngangge mangewala-na ba limi. **36** Ne Zaua wa'i ekangge pa-zàRita-wangga, areipowe pa-zàkita-na Joane; mala hida pawili pa-patanggu-nangga 'jAma, pa-tonggo-la-wi pa-hinana-ngga, hida pawili pa-pawili-nggu, ba hida-dona azàkita-nggawe tutunggu, ba Nia 'jAma apatuka-ngga. **37** Mòno na 'jAma apatuka-ngga Nia dou kaina azàkita baanggawe tutunggu. Nda ndòko-kipumi bai rènge-nawe li'ina bàka bai eta-nawe zadana, **38** mòno ne li'ina nda na-mèndera-kiwe ate danami, mala na pa-patuka-na Nia ba ndai waiduni. **39** Mi-kaniki-ndi iida Zurata; pa-pangèda-mi: Hida-dona pakole dènganda toleka ndaa mbiata limi; ka hida Zurata-ko azàkita-nggawe tutunggu, **40** tàka ndai nauki pamai mbàranggu kai douna toleka. **41** Ngga'i kaa pamboto-wangga atapi'a inda lungguki, **42** tàka kupànde-nggumi, ne manàwara-ni 'jAla ba nda'ingge ate danami. **43** Ne Zaua mai ngindi-ngguwe ngarana 'jAma tàka ndai deimba-kiwangga; ba wa'i ekako amai ngindiwe ngara douna, nia padeimba-milangge. **44** Pei pata mapànde-konawe bai pawai, ne jèmi ia ata ia ata, ngga'i kaa pamboto-wangga olenggu ba limi-dona, tàka ne mboto awalina 'jAla ania waina, nda nia-kiwe pa-kalemata-mi. **45** Ndai pangèda-kangge ba Zaua akàla-wumi mbàrana 'jAma-langge; nàti Mjuza pamène-mi, nia akàla-wumi. **46** Bai wai pia-muni nàti Mjuzana enga wai kaimingga Zaua, mala ba naaila baa-donggawe laranggu. **47** Tàka ba ndai wai-konandi hèti zurata-na Mjuza, pei pata wai-ku-minggandi patèki-nggu, hina.

### [Ba na-pamana'a-ndi ata alima rata Maròmba Jezu](#)

**6:1** Baanangge, nia ka na Jezu ka napala mbali mbònu Nggalelea, mbònu Timberia pa-hidana. **2** Na-luana ata adekuni, ba lènga eta-dandi tandà parawi-na ba na-pandua-wi ata karòduka. **3** Nia ka napène Jezu ne làdakana ka na-mandi'i wa'i pàngu ana panunga-na. **4** Ne pahina waiwe na-dànggeta-we Paza, lòdo ramena ata Jawundi. **5** Na-keketa-wi matana Jezungge ka naeta-we ba na-luana ata aàmèna mbàrana, ka hina-nawe

Paliputa: Nggjee wo'i nianda kambamba ka nanga'a na ata, hina. **6** Ne ba hinangge Jezu, nunga-nani, mala ba napànde doudongge ne pawuku-na paliina. **7** Nawale-we Paliputa: Kambamba anga'a dua ngau ndinara, ndaa tutu-kindi làngo ka pitiko ia ata ia ata, hina. **8** Ka taunawe na aia ana panunga-na, 'jAndaria, angu wuana Zimo Petura: **9** Nèwe wa'ini na lakawa amàngu kambamba alima mbòla mòno aduada ana ia; tàka àpa ndalida tubana na ata anggaina, hina. **10** Ka taunawe Jezu: Patuka-ni na ata ka na-mandi'i ndòba. Ne pandou na-paruta-ngge. Nia kaa mandi'i; wa'i lima ratawa kabani-ko. **11** Ka nadeke-wi hida kambamba Jezu ka na-pamalangi, baa ka nabawe-nandi na ata amandi'i; hina kaindi hida ia, mèli pambei-koda. **12** Baa lèngana pa-bekuta-ngge ka hinandi ana panunga-na: Pakua-ndi kapibi-da tèda nga'a, ngga'i ka nda'i-kana amaletto, hina. **13** Nia kaa pakua-ndi; kambulu duada kapepe manànara-wi hida kapibi-da, tèda nga'ana ata. **14** Ne baa etawe ata ne tanda parawi-na Jezu, nia ka: Na nia-dona na nambi àmeni pònu tana pa-hidana, hida. **15** Ne ba napànde-ngge Jezu pakàmbu ateda, baa wukuna parudu-wa ngga'i ka ta-zangandi-ni ba hidangge, nia ka naeru dòmona Jezu hèti làdakana, tito wai-kidona.

[Ba nakako pònu we'e Maròmba Jezu.](#)

**16** Narawi male-nggenangge, nia kaa ndodo ana panunga-na niri mbònu, **17** kaa pène tena deta kaa pala Kjapenaii. Nanggède-nggenggé tàka nda àme dòmo-kipuni Jezu mbàrada, **18** nia ka ne mbònu làngu mbaniwe kanolaka-na oro-nawe ba nakède paringi kalada. **19** Ba lèngana palima bàka ba ène kilo-nawe paboze-da, kaa ngu etawa Jezu ba nakako pònu we'e ba natuke-wa na tena, ka ne'endi amandauta. **20** Nia ka taunawe Jezu: Zaua-dona ne, ndai mandauta-kana, hinandi. **21** Nia kaa mbeingge deimbawa tena dana, ka nangu pakitana tena làpata kaa dukingge tana pandou aro wa'ida.

[Lara-nawe ne kambamba pa-toleka dènga](#)



**22** Nakoka-nggengge nia ka na ata mangeda ne'e-puni mbali mbònu. Apàndengge ba nda'i tena ekana, ba ndukana na aia, mòno ba nda na-kalete ole dèngandi ana panunga-na Jezuna, ba nduka waida ana panunga-na apala. - **23** Ka àmendi tena eka, awalina Timberia, ne'e mbàra-nawe ne pandou nga'a wa'ida kambamba, ba na-lèngana pa-malangi Mjori. **24** Ba naeta-we na ata ba nda'ini Jesu ne'e mòno ba nda'i dòmondi ana panunga-na, nia kaa pène kaina tena dana, ka nètindi Kjapenaii awewawa Jesu. **25** Baa lèngana paduki-ni mbali mbònungge, ka hidani: Ngguru, pira ba wa'inggu nèwena, hida. **26** Pawale-na Jesu: Lunggu tàka-nggumi, ne bai wewa-wangga, inda nia-kiwe bai età baa tanda, tàka ba lènga nga'ami kambamba bai bekuta. **27** Ndai pawili dènga-kangge tuba-nawe panga'a alòdo-kina, tàka ne panga'a aengana muri wali muri wali, pa-wukuna pajaa-nanggumi Ana atapiVlangge, mala ba Nia-dona patauna tanda 'jAma na 'jAla, hina. **28** Nia kaa tuawa: Pei wa'i-komangge ka mawili-ndi pawili-na 'jAla, hida. **29** Nia ka pawale-na Jesu: Ne niawe ne pawili pa-hinana 'jAla, ngga'i kai wai wa'ini pa-patuka-ha Nia, hinandi. **30** Ka hida-nawe: Àpa tandako parawi-mu wo'u, ngga'i ka maeta mòno ka mawainggu? Àpawe parawi-mu? **31** Hèti umbu-mana anga'a kambamba màna marèda kikapa, ahinana amaaila: Kambamba wali zòrongga danawe pajaa-nandi palii panga'a-da, ahina hida. **32** Ka hinandi Jesu: Lunggu tàka-nggumi, nda niaki Mjuza ajaa-nggumiwe ne kambamba wali zòrongga dana, tàka na'i Amanggu Nia ajaa-nggumiwe ne kambamba wali zòrongga dana ania tàkana. **33** Mala ne niawe kambamba pajaana 'jAla, ne amburu wali zòrongga dana mòno ajaani toleka ata pònu tana. **34** Nia ka hidani Jesu: Mori, jaa paki-kita-nggamawe ne kambamba, hida. **35** Ka hinandi Jesu: Zaua-dona ne kambamba pa-toleka dènga, ba nggàra-kuni amai mbàranggu nda nazulu karemba baaki, mòno ba nggàra-kuni awai wa'ingga nda nazulu maro'u baa-kilangge. **36** Tàka lunggu baa-nggumiwe: Làngo kai età baa-kowangga, tàka ndai pawaiki. **37** Ngara pajaa-nangga 'jAma enga maida mbàra-nggulangge, nia ka na amai mbàranggu, nda ku-tulara pòngu-kini. **38** Mala ne ba kumburu-wangga wali zòrongga dana inda nia-kiwe, ngga'i ka kuliwe pambei dounggu ba lunggu, tàka ne pambeina Na'i apatuka-ngga niawe. **39** Ka ne niawe pambeina Na'i

apatuka-ngga, ngga'i ngara pajaa-nangga ka nda'i-kana papòru-nggu, tàka ngga'i ka ku-pakède-wa nème ba kanduka-nawe-langge. **40** Mala ba niawe ne pambeina Amanggu, ba nggàra-kuni apazèra-ni na Pnana mòno awaini, ngga'i ka nadoungge toleka ndaa mbiata, ka ne Zaua kupakède-wa ba kanduka-nawe-langge, hina. **41** Nia kaa kanguruka-ni ata Jawundi oro-nawe: Zaua-dona ne kambamba amburu baa wali zòrongga dana ba hina, **42** ka taudawe: Na ata, nda niaki Jezu anana Juzupa papànde-nda amana mòno inana? Peina ne ba hinawe: Kumburu baa wali zòrongga dana ka hina-wangge, hida. **43** Ka nawale-wi Jezu: Nda ne'e-kanggumi anguru-nguru. **44** Nda'iki ia ata apànde pamai mbàranggu, nduka-kido-nawe na 'jAma apatuka-ngga ba natàngi-wa, ka ne Zaua kupakède-wa nème ba kanduka-nawe-langge. **45** Wa'ingge amaaila zurata danada hèti nambi2: Pa-panunga ndòba-nandi 'jAla-langge, ahina. Ia ata ia ata arèngewe mòno a-panungana mbàrana 'jAma nia amai mbàranggu. **46** Inda nia-kiwe ba wa'i ata aeta baawa 'jAma; Nia wai-kidona na awalina 'jAla aetawa 'jAma. **47** Lunggu tàka-nggumi, ba nggàra-kuni apawai nadoungge toleka ndaa mbiata. **48** Zaua-dona kambamba pa-toleka dènga ne. **49** Hèti umbumi anga'a kambamba màna nème marèda kikapa, tàka enga mateda. **50** Ne niawe kambamba amburu wali zòrongga dana, ngga'i ba nggàra-kuni anga'angge ka nda namate-kana. **51** Zaua-dona ne kambamba atoleka, amburu baa wali zòrongga dana. Ba nggàra-kuni anga'angge ne kambamba, enga toleka paki-kita-nalangge. Mòno ne kambamba pajaangu Zaua-langge, wèki dou-dungguwe pa-toleka dènga waina ata pònu tana, hina. **52** Ka ne'endi aparika wèki douna na ata Jawundi: Pei pata mapànde-konawe nangge ba najaa-ndawe wèkina ba tanga'a-ngge, hida. **53** Ka hinandi Jezu: Lunggu tàka-nggumi, ba ndai nga'a-kongge wèkina na Ana atapi'a, mòno ba ndai enu-konawe ra'ana, nda'i-kingge toleka doumi. **54** Ba nggàra-kuni anga'a-nggawe wèkinggu mòno aenu-nggawe ra'angu, nia adoungge toleka ndaa mbiata, mòno enga pakède-ngguni he Zaua nème ba kanduka-nawe-langge. **55** Mala ne wèkinggu niawe panga'a pia tàka, mòno na ra'angu niawe paenu pia tàka. **56** Ba nggàra-kuni anga'a-nggawe wèkinggu, mòno aenu-nggawe ra'angu, nia engani Zaua mòno Zaua engangga nia. **57** Ahinana ba na-patuka-ngga

'jAma atoleka mòno ne Zaua ba ku-toleka-wangga orona Nia, hina wa'i kaina na anga'angga ba na-toleka kaina oronggu Zaua. **58** Ne niawe ne kambamba amburu wali zòrongga dana, nda ahina-kinawe hèti umbumi anga'a, baa kaa mate. Na ata anga'angge ne kambamba, enga toleka paki-kita-nalangge, hina. **59** Hida ahinana natèki wa'indi ne'e ba ne'eni a-panungana uma pakàza ne'e Kjapenaii.

### Lara bali oroda ata mangeda

**60** Nia ka nalua-ndi ana panunga-na, ne baa rèngewe ahinana: Namboto-we ne patèki ne, nggàrako apiaku parènge-we, ka hidangge. **61** Ne ba napànde doungge Jezu, hida ana panunga-na baa kanguruka dèngangge ne, nia ka: Ne nia-dowe pawinda dèngami ne? **62** Nia ka pei-konawe ba nia eta-kumini na Ana atapi'a ba nètini apène hèti pandouna ulu-nana? **63** Ngjauwa a-patoleka,: ba nia-kidowe ne wèki nda'iki ndalina. Hèti patèki palunggu-nggumina napangau-wi mòno pa-toleka dèngawi. **64** Tàka wa'indi wàdeka olemi ndaa pawai, hina. Mala na Jezu ba napànde-dongge wali kawunga-na ba nggàrandi ndaa pawai mòno ba nggàrani awukuna papazuu-ni. **65** Ka taunawe: Niawe nia ka: Nda'iki ia ata apànde pamai mbàranggu, nia-kidowe ba najaa-nawe 'jAma, ka lunggu-nggumina, bina. **66** Liingge hina-wenangge nia ka na-luana ana panunga-na abali oro, ndaa zulu paiolo dènga-kini Jezu.

### Pao'o-na Pjetura

**67** Nia ka hinandi Jezu hida akambulu duada: Nda nèti kai-kinggumi jèmi? bina. **68** Ka nawale-we Pjetura: Mori, nggàra mbàrana pakako-ma? Wo'u-kidona all'ina li'i pa-toleka dènga ndaa mbiata. **69** Ne zàme mapawai mòno na-màndungo baawe atema, ne Wo'u ba Amatua-wu tutu 'jAla, hina. **70** Nia ka nawale-we Jezu: Nda kambulu duada-kiwumi ne Zaua ba kupende-wumi? Tàka na aia olemi kambàlika-wa, hinandi. **71** Na patèki-na na Junda anana Zimo Izakario; mala ba nia-dona awukuna pazuuni Jezu, oleda ne hida akambulu duada.

## Lara nda pawaida angu wuana Maròmba Jezu

**7:1** Baanangge na-woleta-pongge Nggalelea Jezu, mala ba nda nanau-dona pakako-kako tana Jundea oro-nawe hida ata Jawundi baa kalemata-wa, ka pamate-wa ba hidani. **2** Nia ka na-dànggeta baawe ramena ata Jawundi, ne rame kawaru ro'o wazu. **3** Ka hidani angu wuana, u-palengge-wu wali wa'i nèwe, ukako-wu hèti tana Jundea, kaa età kainggundi parawi-mu aria panunga-mu. **4** Mala nda'iki ia ata arawi kabuni-na àpa-àpa, mòno ngga'i kaa pàndengga ata, ba hina-dona. Ne bau rawindi hida ahinana, kau bowo wèkina mbàrana ata marigeda hida. **5** Mala làngoka hidako hida angu wuana ba ndaa wai wa'i kaiduni. **6** Ka taunawe Jezu: Ne rapanggu Zaua nda natutu-kipowe, tàka ne rapami jèmi enga ma-mànu-nawe. **7** Nda na-mapànde-kiwe baa mbutu-nggumi ate ata pònu tana, tàka Zaua pambutu-da ate oro-nawe ba ku-zàkita-dawe larada ba na-diraka-we lara paliidà. **8** Kjako-kuwumi hèti rame dana. Ne Zaua nda ku-katekala-kipo padana-ngge ne rame; mala ba nda natutu-kipowe rapanggu, hina. **9** Hina-dawengge nia ka enga-puni Nggalelea.

## Ba ne'eni rame dana kawaru ro'o wazu

**10** Tàka ba lèngana panèti-ndi rame dana angu wua-nangge, ka nèti dou kaini, tàka nda na-pala'o wèki-kina 'jaro, naai pa-kabuni. **11** Nia ka hida ata Jawundi kaa wewawa rame dana: Nggjeeni Nia, bidangge. **12** Nia ka ngàru-ngàru pònguwi ata tutuna Nia. Wa'i: Ata nduawa abina. Wa'i wàdeka: Indaki, pa-tilira-nani ata mangeda ahina. **13** Tàka nda'iki ia ata atèki 'jarowe larana, oro mandauta-dandi ata Jawundi. **14** Ba lèngana patilu rame-wengge ka nètini Jezu uma Ala, ka ne'eni apanunga wa'ina. **15** Kaa karòba ata Jawundi: Peina na ata ka ngu hina pòngu-mowe pàndena, ne ba ndaa panunga-muni, hida. **16** Nia ka nawale-we Jezu: Ne pa-panunga-nggu inda panunga-kingguwe Zaua, tàka Nàme apatuka-ngga. **17** Ba nggàra-kuni ambeingge paliuwe pambeina Nia, enga rèngga-nawe ne pa-panunga-nggu ba awali-nawe 'jAla, bàka ba wali ate doungguwe ba kutèki-we. **18** Na apanewe wali ate douna, mboto dounawe

pa-kalemata-na; tàka na a-kalemata-nawe mbotona nàme apatuka-ni nia abia, mòno nda'iki ndaa tindina wèki detana. **19** Nda niaki Mjuza ajaa-nggumiwe ne li'i uku? Tàka nda'i pònguki ia tàka awa ne jèmi aliawe. Peina pa-kalemata dènga-mingga, ka pamate-wa ba limingga, hinandi. **20** Nia ka nawale-we ata mangeda: Pazora-muwe ne; nggàrani a-kalemata-wu ka pamate-wa ahinanggu? hidani. **21** Ka taunawe Jezu: langge parawi-nggu nia kai karòba dènga ndòbangge. **22** Niawe nia ka lunggu-nggumi: Nàti Mjuzana na-patère baa-nggumiwe pata kamàtuka — nda awali-kinawe Mjuza tàka awali-nawe hèti umbu-ndana — nia ka wa'i kaingge bai kamjàtuka ata lòdo ngau. **23** Ne ba wa'i-dona pa-kamàtuka lòdo ngau, ngga'i ka ndaa lawi-kawe li'i ukuna Mjuza ba hina, peina kai mbutu-wangga ate oro-nawe ba ku-pandua-nawe wèki mbolona ata ba lòdo ngauwe. **24** Ngga'i ka ndai mapiata pònu-kana, tàka ngga'i ka bina pòngu tàka-nawe papiata-mi, hinandi. **25** Nia ka taunawe name wàdeka aia ndou Jeruzale: Nda niaki na pa-kalemata-da, pamate-wa pa-hidana? **26** Tàka patete-kuni na, piaku nia waimona ba na-panewe, mòno nda'i pònguki patèki-dani. Apànde tàka-kaduni hèti paama-paama ba Nia Karetu ne nia? **27** Tàka ba Nia-dona na, mapànde-ngge ba nggjeengge pawali-na; tàka bà àmeni Karetu-langge, nda'iki apànde-nawe pawali-na, hida. **28** Nia ka ne ba ne'eni a-panungana uma Ala Jezu ka hinangge, ba naai pawàndi-ngge li'ina: Pjàndengga ne niangge mòno pjànde-nggawe pawali-nggu; tàka ne mainggu nda pa-pakède dou-kingguwe; pa-patuka-nangga Na'i ania tàkana, nda papànde-mi jèmi. **29** Zaua kupànde-ni, mala ba wali-dungguwe mbàrana, mòno na Nia apatuka-ngga, hina. **30** Nia kaa wewani lara, ngga'i ka wòpawa ba hidani, tàka nda'iki ia tàka awa apala'o-ni lima, ba lènga inda nia-powe rapana. **31** Nia ka na ata mangeda na-luana awaini: Peina ba àmeni Karetu-langge, àti-pundi tanda parawi-na, inda pi'apo parawi-na na? hidangge. **32** Baa lèngana parènge-we ata Parizi, ba binawe pa-kanguruka-da ata mangeda larana Nia, nia ka hida rato kalada mòno ata Parizi kaa pa-tukana ata laa pawòpa-wa. **33** Ka taunawe Jezu: Inda pira baa-kinawe mando'i-nawe ba engangga mbàrami, baa enga nètingga mbàrana nàme Apatuka-ngga. **34** Wjewa-wangga tàka ndai duki-kingga, mòno ne pane'e wa'ingga Zaua nda na-mapànde-kiwe ne jèmi bai dukingge,

hina. **35** Ka ne'endi ata Jawundi apanewe wèki douna: Nggjeengge pandou pa-wukuna pakako-na na onda, nia ka nda taduki-ni ne hito? Nèti-kuni mbàrana nàti ata ambòwara Nggarika dana ka na-panunga dèmoni nàme ata Nggarika? **36** Pei pata-nawe ne patèki-na: Wjewa-wangga tàka ndai duki-kingga, mòno ne pane'e wa'ingga Zaua nda na-mapànde-kiwe ne jèmi bai dukingge, ba hinangge, hida.

### Lara-nawe ne we'e pa-moripa dènga

**37** Nia ka na lòdo kanduka-nawe ne rame, lòdo kalada pa-hidana, ka ne'eni andende Jezu ka hinangge ba naai pawàndi-ngge li'ina: Ba wa'i-kuni amaro'u, ngga'i ka àmeni mbàranggu ka naenu. **38** Ba nggàra-kuni awai wa'ingga Zaua, ahinana li'i-nawe ne Zurata, engga kòkora-da wali wa'i mbàrana loko amàngu we'e moripa-nalangge, hinangge. **39** Ne pa-hinana, lara-nawe Ngjau pa-wukuna padeimba-da ata awaini. Mala na Ngjau ba nda'i-puduni, ba lènga inda afla-podo-danawe mbotona Jezu. **40** Wàdeka ata arèngewi hida patèki: Na nia tàka-baadona nàme nambi, hida. **41** Wàdeka dòmo: Na nia-dona na Karetu, hida. Wa'i dòmo wàdeka: Na Karetu, natimbu wali Nggalelea ne nia? **42** Wòla-nani Ndjauta na Karetu, mòno wali-nawe Mbjataleina, wàno pandouna Ndjauta, nda hina-kiwe ne Zurata dana? hidangge. **43** Nia ka na-matibara na ata mangeda orona Nia. **44** Wa'i wàdeka ka wòpawa ahina, tàka nda'iki ia ata angu pala'o-ni lima. **45** Nia kaa wali hida lakawa pa-pawende mbàrada rato2 kalada mòno ata Parizi, nia ka: Peina ka ndai ngihdiwa? hidangge. **46** Ka taudawe hida lakawa pa-pawende: Nda'i pòngu-kipo ia ata ahina wa'ina panewe-na na'i ata, hida. **47** Nia ka hidangge ata Parizi baa walewi: Ndaa pa-tilira kai-duwumi jèmi ne? **48** Wa'i baa ia ata oleda ata mato bàka oleda ata Parizi awaini Nia? **49** Tàka nàti ata ndaa pàndengge ne li'i uku kareina-nilangge, hida. **50** Nia ka hina-dawe Nikondemu, ole-doda, amai mbàrana Jezu hèti-nana: **51** Peinawe ne li'i ukunda, nangu wiata-konawe tutuna ata, ba nda narènge ulu bèli-konawe patèki-na mòno ba napànde-ngge ba àpawe parawi-na? hina. **52** Nia ka hidani baa walewa: Ne wo'u nia kaiwe Nggalelea pawali-mu? U-kaniki-kongge kau etawe ne Nggalelea, ba nda'i



nambi atimbu wa'i ne'e, hida. **53** Ka wali dou-wali doudawe hèti umada.

**8:1** Tàka na Jezu nètini làdakana Zaito.

### Larana na aia mawine andata

**2** Mbòwaku-nawe tanangge ka ne'e dèmoni uma Ala, ka àme ndòbandi ata mangeda mbàrana, nia ka na-mandi'i ba na-panunga-ndi. **3** Ka àmendi ata kaniki Zurata mòno ata Parizi angindiwa aia mawine paduki wa'i ba nandala, kaa ta'ini tiluna: **4** Ngguru, na mawine aduki wa'ini ba nandala. **5** Dekungge li'i uku pajaa-nanda Mjuzana, enga tauwa watu mawine ahinana; ka ne Wo'u peina patèki-mu, hidani. **6** Ne pahida dèngangge ngga'i ka tanunga-powa, ngga'i ka wa'i pakàla dènga waindani, hida. Tàka na-katongira Jezu ka na-urata waingge langgura lima ne tana. **7** Tàka ba enga nia pòngungge baa tuawa, nia ka nandende ka hina-dawe: Ba nggàra-kuni ne jèmi ndaa màngu zalana ngga'i ka naulu-ni patauwa watu, hina. **8** Baa ka nazulu katongira ka na-urata-we tana. **9** Na baa rèngewe ahinana-ngge nia ka palengge-dawe baa kako ia kako ia, awalina paama-paama làpata kandupu-na, ka tito baada na Jezu mòno na mawine andende tiluna. **10** Ne ba nandende Jezungge, ka nda'i baa ata paeta-na wàtena na mawine, nia ka hina-nawe: Ee paina, ka nggjeendi hida ata? Nda'iki ia ataunggu zala? hina. **11** Ka taunawe na mawine: Nda'iki ia Ngguru, hina. Ka taunawe Jezu: Ba hina-kowe, ne Zauako nda kutau kaikinggu zala; ukako-kuwu, walingge ne ba hinawe ndau zulu diraka dòmo-kana, hina-nawe.

### Ba Nia Jezu a-pa-mangewala-we ne tana

**12** Ka hina dòmongge Jezu: Zaua a-pa-mangewala-we ne pònu tana. Na ata adekungga, nda naliiki kapòta dana tàka enga dounawe awànggara, nia-dowe ne toleka, hina-dawe. **13** Ka hida-nawe ata Parizi: Ne Wo'u mu-zàkita wèki doumu, nda na-mapànde-kiwe ne pa-zàkita-mu, hida. **14** Pawale-na Jezu: Làngo ka ku-zàkita wèki dou-kupunggu ne Zaua, enga mapànde-donawe ne pa-zàkita-nggu, mala ba kupànde-dongge ba nggjee

wali nianggu mòno ba nggjee aro nianggu. Tàka ndai pànde-kingge ne jèmi ba nggjee wali nianggu, bàka ba nggjee aro nianggu. **15** Ne jèmi djekungge pata dadi ata bai piata panewe, ne Zaua nda'i pònguki ia papiata-nggu tutuna. **16** Mòno ne Zaua ba kupiata-konawe tutuna ata enga mawèna-nawe papiata-nggu, ba lènga inda tito-dunggu, mala ba zàme-dona baama 'jAma apatuka-ngga. **17** Ne'e zurata ukumi wa'ingge amaaila: Pa-zàkita-da ata aduada, nia amawèna, ahina. **18** Zaua ne azàkita-ngge tutu dounggu mòno na'i Ama apatuka-ngga nia azàkita dòmo-nggawe tutunggu, hina. **19** Ka taudawe: Nggjeeni Amamu, hida-nawe. Ka nawale-we Jezu: Ne jèmi ndai pànde-kingga mòno na Ama-kunggu ndai pànde dòmo-kini. Bai pànde pia-mongga ne Zaua enga pànde kaimini Amanggu, hina. **20** Ne'e mbàra pandouna pàti maraka niawe patèki wa'i-nandi hida ahinana, ba tèngara ne'eni a-panungana uma Ala. Tàka nda'iki ia awòpawa ba lènga inda nia-powe rapana.

### Ba na-zàkiia dòmongge tutu douna Jezu

**21** Nia ka hina dòmo-dawe: Ne Zaua nètingga hèti mòno wjewa-wangga-langge, mòno mjate ngindiwe zalami; heti panèti àtingga Zaua, nda na-mapànde-kiwe bai dukingge ne jèmi, hina. **22** Ka taudawe ata Jawundi: Na-wukuna pa-pamate wèkina na? Mala hèti panèti àtingga Zaua, nda na-mapànde-kiwe bai dukingge ne jèmi ba hina-dongge, hida. **23** Nia ka hinandi Jezu: Ne jèmi wali bjawa-wumi, ne Zaua wali bjondo-wangga; ne jèmi wali-miwe ne pònu tana, ne Zaua nda wali-kinggiwe ne pònu tana. **24** Niawe nia ka: Mjate ngindiwe zala-milangge, ka lunggu-nggumi; mala ba ndai pawaiko ba Zaua baa ne, enga mate ngindi-miwe zala-milangge, hina. **25** Ka taudawe: Ka nggàranggu ne wo'u, hidani. Nia ka hina-dawe Jezu: Àpa dòmo lara-nawe ba ku-panewe dènga-nggumi? **26** Alua-pona pa-wukuna patèki-nggu mòno papiata-nggu larami ne jèmi; tàka na'i Apatuka-ngga nia abia, mòno ne Zaua hida parènge-ngguni nia-duwi patèki-ngguni na ata pònu tana, hina. **27** Tàka ndaa rèngga-kiwe ba niawe larana 'jAma patèki-nandi. **28** Nia ka hina-dawe: Bai lèngana pa-kekata-wa Ana atapi'a-langge, wudi pjàndengge ba Zaua baa ne, mòno ba'nda'i pòngu

ia parawi dounggu, tàka ahinana pa-panunga-nangga 'jAma ba niawe patèki-nggu. **29** Nia ka nàme Apatuka-ngga, enga niani mbàranggu, nda nangga'i kanua-kingga, mala ne Zaua ba kulii ma-mànu-duwi awèna-nawe atena, hina.

### Lara-nawe ne abia a-pambembata

**30** Lèngana pa-hinandi hida-nangge na-luana ata awaini. **31** Nia ka hinandi Jezu hida ata Jawundi apawai baa: Ba enga nia-dongge atemi ne li'inggu, ana panunga tàka-nggunggumi-langge, **32** nia kai pàndengge ne abia, ka ne abia nia a-pambembata-wumi-langge, hina. **33** Nia ka pawale-dani: Ne zàme wòla wua-nanggama 'jAmbarango, mòno inda ndòko-kipoma ba maata mbàra ata. Peina, a-pambembata-wumi-langge ka lumu-wawu, hidani. **34** Ka taunawe Jezu: Lunggu tàka-nggumi, ba nggàra-kuni aliiwe azala, ata-nani zala. **35** Na paata nda enga paki-kita-kini ne uma, nia-kidona na paana aenga paki-kitana. **36** Nia ka na Paana ba na-pambembata-kuwumi, niawe nia kai mbembata ta-tàka. **37** Kupàndenggumi ba wòla wua-nanggumi 'jAmbarango, tàka wjewangga lara ka pamate-wa ba limingga, oro-nawe ne li'inggu ba nda natama-we ate danami. **38** Ne Zaua, hida paeta-ngguni 'jAma niawi patèki-nggu, ka ne jèmiko hida parènge-mini amami niawi parawi-mi, hina. **39** Kaa walewa: Na 'jAmbarango, nia amama zàme, hida. Nia ka hinandi Jezu: Ba ana-donanggumi 'jAmbarango, liiwi paliina 'jAmbarango. **40** Tàka ne ba hina, wjewangga lara ka pamate-wa ba limingga, na ata atèki baa-nggumiwe ne abia, ne parènge-nggu mbàrana 'jAla. Ne ahinana nda nalii-kiwe 'jAmbarango. **41** Jèmi ne, liimindi paliina na amami, hina. Nia ka: Ne zàme inda ana pawengga-kiwama. Ia-kini amama na'i 'jAla, hidani. **42** Ka hinandi Jezu: Ba Nia piamo 'jAla amami, nda napakai-kiwe bai manàwara-ngga. Mala ne Zaua ba wali-dungguwe 'jAla ba kumai mòno ba wa'ingga neti. Ne ba kumai, nda wali ate dou-kingguwe, tàka Nia apatuka-ngga. **43** Àpa nia ka ndai rènggawe ne panewe-nggu? Oro nda mapànde-donawe bai rènge-nggawe ne li'inggu. **44** Ne jèmi wali-miwe kambjàlika, amami, mòno hèti pambeina amami niawi pambeimi bai

dekundi. Nia apamate ata wali-pongge kawunga-na mòno nda ne'e wa'i-kini abia, mala ba nda'i-kingge abia ne'e nia. Ba natèki-kowe aboto, pata'dou baanawe ba hinangge, mala ba aboto-dowa mòno ba pu'u-donani boto. **45** Tàka ne Zaua, ba lènga tèki-ngguwe ne abia, nia ka ndai waingga. **46** Nggàrani ne jèmi ajaa tanda tanduka ba kuzala-wangga? Ba kutèki-dowe ne abia, peina ka ndai waingga? **47** Ba nggàra-kuni awali 'jAla enga rènge-nandi li'ina 'jAla; ka ne niawe panda parènge dènga-mindi, oro-nawe ba nda wali 'jAla-wumi, hina. **48** Nia kaa walewa ata Jawundi: Mala ndà natena tàka-kiwe patèki-ma ba ata Zamaria-wu, mòno bau pazora-wu? hidani. **49** Pawale-na Jezu: Ne Zaua nda'iki zoranggu, tàka pamboto-ngguni Amanggu, tàka ne jèmi kjòndoka-ngga. **50** Nia ka ne Zaua, inda kalemata-kingguwe mboto dounggu; wa'ini a-kalemata-nggawe mòno Nia atauna zala. **51** Lunggu tàka-nggumi, ba wa'i-kuni a-pamèndera-nggawe ne li'inggu, enga inda pànde-kinawe mate-langge muri wali muri wali, hina. **52** Ka taudawe ata Jawundi: Nia ba mapànde-ngge baa zuzura-wu zora. Nàti 'jAmbarango mòno hèti nambi amate baa, tàka ba wa'i-kuni a-pamèndera-nggawe ne li'inggu, enga inda pànde-kinawe mate-langge muri wali muri wali, lumu-wangge ne Wo'u. **53** Murei-powa 'jAmbarango, amama nàti amate baa? Hida wa'i kaina hèti nambi. baa mate baa. Ka nggàra pòngu-kunggu ne Wo'ungge? hidani. **54** Ka pawale-na Jezu: Ba ku-pamboto wèki doukunggu, nda'iki lara-nawe ne mbotonggu. Tàka na Amanggu Nia apamboto-wangga, Nia-dona na Alama pa-limina. **55** Ne jèmi ndai pànde-kini, tàka ne Zaua kupànde-ni. Nda kupànde-kini ba nia lunggu-kuni, ku-pamera dènga baanggumi, aboto. Tàka kupànde-ni mòno ku-pamèndera-nawe li'ina. **56** Nàti 'jAmbarango, amami, na-kalada dèngangge atena ba na-wukuna paeta-wa lòdonggu, nia ka naeta baawa, mòno nduka ndeta ate baawa, hina. **57** Nia ka hida-nawe ata Jawundi: Nda lima kambulu ndoupumu ne, mòno mueta baawa 'jAmbarango? hida. **58** Ka taunawe Jezu: Lunggu tàka-nggumi, ne ba nda'i-puni 'jAmbarango, wa'ingga ne Zaua, hinandi. **59** Niawe nia kaa pilo watu ka kabena-wa ba hidani. Tàka na-mangeru Jezu ka nètini alouzo wali uma Ala.

[Larana Jezu ba na-pandua-wa aia ata adadi ngindiwe kabura-na.](#)

**9:1** Ne ba nakako-ngge ka naeta-wa aia ata adadi ngindiwe kabura-na. **2** Nia kaa tuawa ana panunga-na: Ngguru, nggàrani azala, na onda ree, bàka hida apadadi-ni, ka zupu dadi ngindi-nawe kabura-na, hida. **3** Nia ka pawale-na Jezu: Nda niaki azala na, mòno nda hida dòmoki apadadi-ni, tàka ne ba hina, ngga'i ka naounda waiwi pawili-na 'jAla. **4** Ba wa'i-puni lòdo ka enga pawili-ndandi pawili-na nàme Apatuka-ngga; mala enga nggède-nawe-langge ba nda na-mapànde-we ia ata ba na-pawili. **5** Ba ne'e-pongga pònu tana, Zaua a-pa-mangewala-we ne tana, hina. **6** Lèngana pa-hinangge, nia ka napani'i tana deta, ka na-pandoreka waingge we'e pani'i ne tana, baa ka nadeke-we ne tana, ka naora-nandi matana na akabura. **7** Ka hina-nawe: Ukako-wu kau pariwo-wi ne'e. pandou riwo Ziloa, ba palali-kowe: Pa-patuka, hinawe. Nia ka nètini apariwo-wi; ba nabali-ngge aeta baa matana. **8** Nia ka taudawe ole wànona mòno ata andòmani hètina ba ata madèngi-wa: Nda niaki nàti ata aka-kàli mandi'i pa-madèngi-na? hida. **9** Wa'i ata: Nia-dona ahina. Wa'i dòmo: Nda niaki, nia-kidowe ba ole matada. Ka ne nia douna: Zaua-dona, hina. **10** Ka hida-nawe: Peina pata età balida matamu? hida. **11** Ka nawale-we: Nàti ata, Jezu pa-hidana, na-pandoreka-we tana, ka naora-nggandi matanggu: Ukako-wu ne'e pandou riwo Ziloa, kau pariwo-wi, hinangga. Kukako-wangga ne'engge, mòno ba ku-pariwo-wingge kaa ngu età matanggu, hina. **12** Nia kaa tuawa: Nggjeeni nàti ata, hidani. Nda kupànde baani, hina. **13** Nia kaa ngindiwa na ata akabura hètina-na mbàrada ata Parizi. **14** Nia ka tangawe ba lòdo ngauwe ba na-pandoreka-we tana Jezu mòno ba na-paeta-nandi matana. **15** Nia ka hida ata Parizi kaa tua dòmo kaiwa: Pei pata etamu, hidani. Ka hina-dawe: Naora-nggandi tana ndoreka matanggu, baa ka ku-pariwo-wi, ka kungu età, hina. **16** Ka taunawe name wàdeka ata Parizi: Na ata ndaa wali-kinani 'jAla, mala ba nda nadeku-awa-wangge pata lòdo ngau, hida; wàdeka: Pei pata mapànde-konawe ata zala ba na-rawina tanda ahinana, hida. Nia kaa mabawe. **17** Niawe nia kaa tua dòmowa na ata kabura: Ne wo'u peina lumuni nàti, ne ba na-paeta-nggundi matamu, hidani. Nambi-wa, hina. **18** Tàka hida ata Jawundi ndaa wai-kinawe larana na ata ba na-kabura hètina mòno ba naeta ne ba hinawe, làpata kaa pamaiwi inana amana na ata alèngana paeta baa, **19** kaa tuawi:

Ana-dumini na, adadi ngindiwe kabura-na pa-limina? Pei pata etana ne ba hinawe? hida. **20** Nia ka taudawe inana amana: Mapànde tàkani na ba ana-mani mòno ba nadadi ngindiwe kabura-na. **21** Tàka ba peikona ka zupu etana ne ba hinawe mòno ba nggàra-kuni apaeta-nandi matana, nda'iki papànde-ma zàme. Tua doukowa nia, namàto baadona, ngga'i ka na-panewe douna. **22** Pahida dèngangge inana amana, oro-nawe baa madauta-ndi ata Jawundi. Mala hida ata Jawundi aworo baangge: Ba wa'iko ata Karetu-wa ahinani, ka weitaka-ni wali uma pakàza, hida. **23** Niawe nia ka: Namàto baadona, tua doukowa nia ka hidangge inana amana. **24** Nia kaa zandèka dòmo baa pamaiwa na ata kabura hètina: Pamboto-wa 'jAla. Ne zàme mapànde-ni nàti ata ba ata zalawa, hidani. **25** Pawale-na nia: Ba ata zala-kowa, nda kupànde-kingge. Ia-kidongge papànde-nggu: Ku-kabura-wangga hètina-na, kueta-wangga ne ba hinawe, hina. **26** Ka hida-nawe: Peinanggu-na? Pei wa'i-nawe ba na-paeta-nggundi matamu? hida. **27** Ka nawale-we: Kutèki baa-nggumiwe, tàka ndai pato'o-kiwe. Peina ka marènge-we ka limi dòmowa? Ka ana panunga-nanda limi kaiwumi ne jèmi? bina. **28** Nia kaa kòndoka-ni: Ne wo'u ana panunga-nanggu, ne zàme ana panunga-nanggama Mjuza. **29** Ne zàme mapànde-ngge na 'jAla ba na-panewe dènga baani Mjuza, tàka na ata nda mapànde-kingge pawali-na, hida. **30** Ka nawale-we na ata: Pa-karòba dènga-dowe ne, ne jèmi ba ndai pàndengge pawali-na, mòno nabaa pa-paeta-nggandi matanggu. **31** Tapànde-ngge na 'jAla ba nda narènge-wa ata zala, tàka na ata amomoni mòno aliinawe pambeina, nia-kidona parènge-na. **32** Wali-pongge kawunga dadi tana, nda parènge-kipo ata apaeta-nandi matana ata adadi ngindiwe kabura-na. **33** Ba nda wali-konani 'jAla na ata, nda na-mapànde-kiwe ba wa'i parawi-na, hina. **34** Nia kaa walewa: Ne wo'u na-diraka pònguwe dadimu, mòno uzulu panunga-wanggama ne zàme? hida. Nia kaa weitaka-ni. **35** Ne ba narènge-we Jezu na ata baa weitaka-ni, ka hinani ba na-patanga dèngani: Uwai wa'i-duni na Ana atapi'a? hina. **36** Ka taunawe na ata: Nggàrani, Mori, ngga'i ka kuwaini, hina. **37** Ka hinani Jezu: Mueta baawa, na apanewe dènganggu, nia-dona, hina. **38** Ka taunawe: Kupawai-wangga, Mori, hina. Ka na-kawodo arona. **39** Ka hinangge Jezu: Pamai dènganggu ne pònu tana,



ngga'i ka na-mawiata-we tutuda ata, hida ndaa età ngga'i kaa età, mòno aeta kaa kabura, hina. **40** Nia ka hida ata Parizi awa'ina mbàrana, ne baa rèngewe ne ahinana, ka hidani: Ne zàme ma-kabura kai-kowama? hida. **41** Ka hina-dawe Jezu: Bai kabura piamo nda'iki zalami, tàka maeta-wama ba lènga limingge, niawe nia ka engangge zalami, hina.

### Larana ma-djàndango andua.

**10:1** Lunggu tàka-nggumi, ba nggàra-kuni ndaa Hi wa'i bina dana ba natama nggòlu mbembe, tàka a-kàràketa wa'i karape nggòlu, ata keduwa, ata kabukuta-wa. **2** Tàka na alii wa'i bina dana, ata ma-dàndango-wa adàndango-wi mbembe. **3** Nia ka na kjandi bina nawuke-ni bina, mòno hida mbembe arènge-nawe li'ina, nia ka na-kaaula-dawe ngarada mbembe douna, baa ka na-palouzo-ndi nggjounga. **4** Ba **1** na Vlèngana pa-palouzo ndòbandi mbembe dounangge, ka naulu nia baa kaa dekuni hida mbembe, mala baa tanda-donawe li'ina. **5** Tàka nàme ata eka ndaa deku-kini, akenduni, mala ba ndaa tanda-donawe li'ina na ata eka. **6** Na li'i tuda natèki-dani Jezu, tàka ndaa rèngga-kiwe ba àpawe ne pawuku-na patèki-nandi. **7** Niawe nia ka hina dòmondi Jezu: Lunggu tàka-nggumi, Zaua ne, bina-dangga hida mbembe. **8** Ngara-ndukada aulungga Zaua baa mai, ata keduwi mòno ata kabukuta-wi, tàka hida mbembe ndaa rènge-kiwi hida. **9** Zaua-dona ne bina; ba nggàra-kuni atama lii wa'i-wangga Zaua, na-mànango-langge, ka natama louzo mòno na-kolena pa-manòpa wa'i-nalangge. **10** Na ata kedu ba àmeni, mainawe pakedu mòno padoro mòno pa-pamòda. Ne mainggu Zaua, ngga'i kaa toleka mòno ka nambajo-we toleka-da lunggundi. **11** Zaua-dona na ma-djàndango andua. Na ma-djàndango andua natau wèkina oro lumu dènga-nandi mbembe. **12** Na ata ure ba lènga inda nia ma-djàndango mòno ba nda potè dounandi hida mbembe, ba nia eta-kona ba àme bòngga uta, nangu dundaka-ndi hida mbembe ba nètini akendu, nia ka na bòngga uta ka narè'e-ndi mòno ka na-pòwara-wi. **13** Pakendu dèngana na ata ure, mala ba ata ure-dowa, ndaa ànga dènga wa'indi hida mbembe. **14** Zaua-dona na ma-djàndango andua; kupànde-ndi hida dounggu mòno hida dounggu apàndengga Zaua, **15**

ahinana 'jAma ba napànde-ngga Zaua, mòno ne Zaua ba kupànde-ni 'jAma, mòno kutau wèkinggu oro lurrui dènga-nggundi mbembe. **16** Wa'i-pundi mbembenggu wàdeka ndaa mbembe nggòlu, enga zoka kainggundi mòno enga rènge-doda-nggawe li'inggu, nia ka ia pia kabàba-da mòno ia piani ma-djàndango. **17** Niawe nia ka na-manàwara-ngga 'jAma ba lènga pazèla-ngguwe toleka-nggu ngga'i ka kudeke baliwe. **18** Nda'iki adeke-nggawe, tàka ne Zaua ku-pazèla kalongga atewe. Kumboto-ngge ba ku-pazèla-we mòno kumboto-ngge ba kudeke baliwe. Hinawe ne li'i pakole-nggu wali Amanggu, hina. **19** Nia ka na-mabawe pi'a dòmo ata Jawundi oroda hida patèki. **20** Nia ka na-luana oleda: Azuzura-wa zora mòno nandu'a; àpa nia kai rèngewa na, ahina. **21** Wa'i dòmo: Hida patèki nda patèki ata pa-zuzura zora-kiwi. Na-mapànde-kadowe zora baa paeta-nandi matana ata kabura? ahina.

### [Patèki-na Maròmba Jezu ne rame pa-matua uma Ala.](#)

**22** Baanangge ka wa'ingge rame pa-matua uma Ala ne'e Jeruzale; riwuta-we. **23** Nia ka na Jezu ka ne'eni uma Ala niri kawendo Zolema. **24** Nia kaa woleta-ni ata Jawundi, ka hida-nawe: Pira nggaipowe mando'i-na bau pakàdo-nggamawe atema? Ba Karetu tàka-duwu ne Wo'u, utèki ailolo-nggamawe, hida. **25** Ka hina-dawe Jezu: Kutèki baa-nggumiwe tàka ndai pawai-ki. Hida pawili pa-pawili wainggu ngarana Amanggu, hida azàkita-nggawe laranggu; **26** tàka ndai pawai-kiwumi, mala ba nda ole-doda-nggumi mbe-mbenggu. **27** Hida mbembenggu arènge-nggawe li'inggu, mòno kupànde-ndi hida, nia kaa dekungga. **28** Mòno ne Zaua kujaandi toleka ndaa mbiata, nia ka nda karei-kinandi muri wali muri wali-langge, mòno nda'iki aparewo-nggandi wali lima dananggu. **29** Na pajaa-nangga Amanggu narei mbolowi, mòno nda'iki ia apialcu parewo-nandi wali lima danana 'jAma. **30** Ne zàme baama 'jAma iama, bina. **31** Kaa zandèka pi'a dòmo ata Jawundi baa ngindi watu, ka kabena-wa ba hidani. **32** Nia ka pakède-nawe Jezu: Nalua-ndi pawili andua paoro-na 'jAma pabowo-nggunggumi, nggjeengge ne pawili pa-kabena dènga-mingga, hinandi. **33** Pawale-dani ata Jawundi: Nda

nia-kiwe pawili andua ka kabena-wa ba limanggu, tàka ne bau kòndoka-ni 'jAla; ne Wo'u, Ala-wangga ba lumu mòno ne ba atapi'a-muwu, hida. **34** Ka nawale-wi Jezu: Nda hina-kiwe ne'e zurata uku mi: Ala-wumi, lunggu baa-wangga, ahina? **35** Hida ata pandou duki-nawe li'ina 'jAla, Alawi, ba hina baadundi, mòno ne li'i Zurata ba nda na-mapànde-kiwe ba kaingge, **36** peina, kòndoka-muni 'jAla ba limi-wami na pa-pamatua-na 'jAma, pa-patuka-na nèweti pònu tana, oro-nawe Ana-nangga 'jAla ba hina? **37** Ba nda kuwili-kundi pawili-na Amanggu, ndai waikangga. **38** Tàka ba kuwili-ndi, mòno ndai wai dòmo-kopongga, ngga'i kai wai wa'i-kundi hida pawili, ngga'i kai rènggawe mòno kai pàndengge na 'jAma ba ne'eni Zaua mòno ne Zaua ba ne'engga 'jAma, hina. **39** Nia ka wòpawa ka hida dèmoni, tàka dàpa wamo-wamowi. **40** Ka nòti dèmoni mbali Jarandena pandou kawunga pariwo wa'ina ata Joane hètina, ka engani ne'e. **41** Nia ka na-luana ata amai mbàrana: Nàti Joane nda'i pònguki tanda parawi-na ne niangge, tàka ngara hèti patèki-na Joane larana na ata, ahina tàka-nawe, hidangge. **42** Na-luana ata ne'e awaini Jezu.

### Lara pakède bali-nani Lazaru Maròmba Jezu,

**11:1** Wa'ini aia ata karòduka angarana Lazaru, ata Mbaitani, wànoda Maria baada Màrata angu mawine-na. **2** Na Maria nia-dona aburini we'e lengi bou mbangi Jezu, mòno aopi wainandi longgena wa'ina. Nia ana'ani Lazaru a-karòduka. **3** Nia ka hida wòtona apatuka-ni ata Jezu: Mori, na'i pa-manàwa-ra-mu ne'eni a-karòduka, hidani. **4** Ne ba narènge-we Jezu ne ahinana: Ne karòduka nda tutu pamate dènga-kiwe, tàka tutu mboto-nawe 'jAla, ngga'i kaa pamboto dènga wainawe Anana 'jAla, hinangge. **5** Na Jezu na-manàwara-ndi Mjàrata baada angu mawine-na mòno Lazaru. **6** Ne ba narènge-we ba na-karòduka-ngge, ka enga-puni adua lòdona ne pane'e wa'ini. **7** Baangge ka hinandi ana panunga-na: Mjainda ka tabali-wanda Jundea, hina. **8** Ka hida-nawe ana panunga-na: Ngguru, àngu wudi wewa-danggu lara ata Jawundi ka kabena-wa ba hidanggu, mòno nèti dòmonggu hèti, hida. **9** Ka nawale-we Jezu: Ne anggazu' lòdo inda kambulu duada ndjamu-kinawe? Ba nakako waidongge lòdo ata, nda

na-katunura-ki, ba lènga eta-nawe mangewala-nawe ne tana. **10** Tàka ba nakako waikongge nggède ata, enga katunura-na, mala ba nda'i-dongge mangewala douna, hina. **11** Hinangge Jezu-nangge, baa ka hina dòmo-dawe: Nandura baa Lazaru, kandua-nda na'i, tàka nètingga hèti aparòdu-wa, hina. **12** Ka hidani ana panunga-na: Ba nandura baadona Mori, enga ndua-dona-langge, hida. **13** Tàka lara matena niawe patèki-na Jezu; tàka pa-pangèda-da hida, ne kolena ndura niawe, hidangge. **14** Nia ka nangu wuke lolo-dawe: Namate baana Lazaru, **15** mòno nandeta dèngangge atenggu ba nda'ingga ne'ena, oro lumu dènga-nggunggumi, ngga'i kai pawai, hinandi. **16** Nia ka na Tjoma, Ndindimu pa-hidana: Mjainda ka takako kaiwanda, ngga'i ka tamate marènga dèngani, hinandi ole ana panunga-na. **17** Ne ba naduki Jezungge, nia ka nakole-ngge ba pata lòdo baana rate dana. **18** Ne Mbaitani mbàra Jeruzale-we, wa'i touda kilo-nawe màro-nawe. **19** Nia ka na-luana ata Jawundi amai mbàrada Màrata baada Maria ka pa-malèna-dawe ateda, ba lènga matena na'ada ba hida. **20** Rènge-kinawe Mjàrata lara àmeni Jezu, ka palengge-nawe ka nètini alaa parèngga-wa; tàka na Maria engani uma. **21** Nia ka hina-nawe Jezu Mjàrata: Ba wa'i pia-munggu nèwena, Mori, nda hinaki ba namate na'anggu. **22** Ka neko, kupànde-ngge ba àpako padèngi-muni 'jAla, ba enga jaananggu 'jAla, hina. **23** Ka hina-nawe Jezu: Na na'amu, enga kède bali-dona-langge, hina. **24** Taunawe Mjàrata: Kupànde-ngge ba nakède nème pakède wai ba kanduka-nawe-langge, hina-nawe. **25** Ka hina-nawe Jezu: Zaua ne ne kède mòno ne toleka. Na ata awaingga ne Zaua, làngo ka namate-kopo, enga toleka-nalangge. **26** Mòno ba nggàra-kuni atoleka mòno awaingga ne Zaua, nda namate pònguki muri wali muri wali-langge. Uwai-dongge ba hinawe? hinani. **27** Ka taunawe Mjàrata: Ahina tàka-nawe Mori, kuwai baangge ne zaua ba Karetu-wu ne Wo'u, Ana Ala, awukuna pamai nèwe pònu tana, hinani. **28** Lèngana pahina-nggengge, ka nètini apamai katènara-wa Maria, angu mawine-na: Wa'ini Nggjuru ka àmeni hinanggu, hina-nawe. **29** Rènge-kinawe Maria-ngge ka nangu kède ka nètini mbàrana. **30** Nda natama-kipo Jezu wàno dana, enga-puni ne'e pandou parèngga wa'i-nani Mjàrata. **31** Nia ka hida ata Jawundi olena

Maria ne'e uma, ka pamalèna-nawe atena ahinani, ne baa etawa ba ngu jaa kèdewa palouzo, ka nètindi adekuni, nètini rate dana pang'i'o wa'i ne'e, hidangge. **32** Eta-kinani Jezu na Maria, nduku ba hina ne'e pane'e wa'ini, ka nangu kawodo aro wa'ina: Ba wa'i pia-munggu nèwena Mori, nda hinaki ba namate na'anggu, hina. **33** Ne ba naeta-wa Maria na Jezu ba nang'i'o mòno hida ata Jawundi marènga-na baa ngi'o kaina, ka naita ate dèngangge, nduka-zanduka-we atena. **34** Ka hina-dawe: Nggjee bendala nia-mini? hina. Umai kau età, hidani. **35** Ka nang'i'o Jezu. **36** Nia ka taudawe ata Jawundi: Patjete-kuni, ba na-manàwara pònguni, hida. **37** Tàka wa'i kaina ne hida: Na onda apaeta baanandi matana nàti ata kabura, peina nda na-mapànde-kiwe ba nadai kaiwe ngga'i ka nda namate-kana na ata? ahina. **38** Nia ka na Jezu ka naita dòmongge atena, ka natuke-we ne rate. Ne rate liango-we mòno wa'ini ambolo watu kàmbaka-na. **39** Ka taunawe Jezu: Kjaini na watu, hina. Tàka na Mjàrata, wòtona na amate: Nabou baa Mori, mala ba pata lòdo baadona, hina-nawe. **40** Ka hinani Jezu: Bau pawai-dona, enga eta-dumuwe na mbotona 'jAla, inda lunggu-kingguna? hina. **41** Nia kaa kaini na watu. Baa nia ka na-tangara Jezu ka hinangge: Oo Ama, ku-pamalangi-wu, ba lènga rènge baa-dumungga. **42** Kupànde baangge ne Zaua ba enga rènge ma-mànu-mungga, tàka orona na ata mangeda awoleta-ngga, nia ka lunggunggu, ngga'i kaa pawai ba Wo'u apatuka-ngga, hina. **43** Lèngana pa-hinangge ka na-kawuula ba naai pawàndi-ngge li'ina: Tjoo Lazaru, ulouzo-wu nème, hina. **44** Nia ka nangu louzo tàka na amate, enga-pundi kibo lima deta wa'i detàna, mòno ne matana pa-kamboro-powe kamba. Ka taunawe Jezu, kainandi, pilini ka nakako, hina.

### [Lara wjata-dawe rato kalada tutuna Jezu, ka pamate-wa ba hidani](#)

**45** Na-luana ata Jawundi amai paduki-ni Maria, ne baa etawe ne parawi-na Jezu, nia kaa waini. **46** Tàka hida oleda wàdeka nètindi alaa paduki-ndi ata Parizi kaa tèki-dawe ne parawi-na Jezu. **47** Niawe nia ka hida rato kalada mòno ata Parizi kaa pakua-ndi amandi'i-na panewe: Peinda? Mala nalua baandi tanda parawi-na nàti ata. **48** Ba ta-pakaloko-kuni ba bina, wai

mbolo baadani ata-langge; kède baadanda ata Roma, abera-ndawe pandounda mòno apamua-ndawe pa-mandi'i-nda hito ata Jawundi-langge hida. **49** Nia ka na aia oleda, angarana Kajapa, aRato Kalada ne ndou: Ne jèmi nda'i pònguki papànde-mi, **50** mòno ndai pangèda wa'i-kingge ba mangu lara-nawe ne jèmi, ba namate ata aia tutuna atana Mjori, mèli ka nda karei mbolo-kanani na ata, bina. **51** Tàka ne ba hinangge inda pa-pakède dou-kinawe, tàka ba lènga Rato Kalada-wa ne ndou, ka natèki ulu memawe larana Jezu, ba na-wukuna paniate oro lumu dènga-nani na ata Jawundi, **52** mòno inda nduka dòmo-kina na ata Jawundi, tàka ngga'i ka na-pakàza-ndi ngara anana 'jAla azai-zai, ka iandi. **53** Liingge hina-wengge kaa panewe-ngge, ka pamate-wa Jezu ba hida. **54** Niawe nia ka na Jezu nda nazulu paeta wèki-kina tiluda ata Jawundi, tàka nètini wali wa'i ne'e hèti tana ngàmbe-nawe marèda kikapa, ne'e wàno Eparaima pa-hidana, ka engani amandaka wa'i pàngu ana panunga-na. **55** Nia ka na-dànggeta rame Pazana ata Jawundi, mòno na-luana ata wali tana Jawundi a-katekala Jeruzale toma nda naduki-powe rame Paza, ka pamatua wèkina ba hida. **56** Nia kaa wewawa Jezu kaa panewe wèki douna ne ba ne'endi uma Ala: Peina limi jèmi? Nda àme-kuni ne rame dana-langge? hida. **57** Tàka hida rato kalada mòno ata Parizi ajaa baawe li'i: Ba nia wa'iko apàndengge pandouna Jezu, ka natèki-we, hida, ngga'i ka piaku wòpa-dani.

### Lara buri-dani we'e lengi Maròmba Jezu ne'e Mbaitani

**12:1** Wa'i ène lòdo kia-nawe ba rame Paza-wengge, ka naduki Jezu ne'e Mbaitani, pandou ne'e wa'ini Lazaru, pa-pakède-kona Jezuna wali tilu ata mate. **2** Nia kaa kulani Jezu ne'e; na Mjàrata nia a-pawatana panga'a, ka na Lazaru nia kaina ia amana'a ole dèngani Jezu. **3** Nia ka na Maria ka nadeke-we aia kati we'e lengi narawatu ta-tàka amboto wèlina, ka naburi-nandi wa'ina Jezu, baa ka naopi-opi wainandi longgena, nia ka bounawe ne we'e lengi narawatu ka na-làmboka-ngge uma. **4** Ka taunawe na aia ana panunga-na, na Junda Izakario, awukuna papazuu-ni Jezu: **5** Àpa ka nda bàta-mongge ne we'e lengi ka kolena tòlu ngau ndinara, mòno



ka nggatani nàti ata ndengo, hina. **6** Nia ka ne ba hinangge na Junda, inda oro lumu dènga-kinandi andengo, tàka ba lènga ata keduwa, mòno ba nia-dona atèreni pandou òma ka nade-dekewi pakole. **7** Ka taunawe Jezu: Ndau ula-kani na mawine; ngga'i ka nggòba pabèli baa-ko-nanggawe tutu-nawe lòdo patane waiwangga. **8** Mala ata ndengo ba enga ma-mànu-dundi mbàrami, tàka ne Zaua nda enga pati-tiri-kingga mbàrami, hina. **9** Na-luàna ata Jawundi akolengge ba wa'ini Jezu ne'e, ka àmendi, inda tito-kina Jezu pawuku-da, tàka ngga'i ka taeta wai kaiwa Lazaru, pa-pakède balina wali tilu ata mate, hidangge. **10** Nia kaa pa-merana panewe rato<sup>2</sup> kalada, ngga'i kà pamate kaiwa Lazaru ba hidangge, **11** mala orona nia nia ka na-luana akako kaa wai wa'ini Jezu.

### Lara tamana Maròmba Jezu Jeruzale

**12** Koka-nawengge ne ba narènge-we ata mangeda, amai parame, lara àmeni Jezu Jeruzale, **13** nia kaa dekena ro'o naba ka nètindi aparèngga dèngani, ka ne'endi ajawau-jawau: Ozana, na-maringi-dona nati amai waingge ngarana Mjori, nati Zangandi-na ata Izaraila, hida. **14** Nakole-ni na aia kabondi kalandai na Jezungge, ka na-kalete-wa ahinana amaaila Zurata dana: **15** Ndau mandauta-kana, ee lakèra Zio. Patjetena, àmeni Zangandi-mu, akalete ana bei kalandai, ahina. **16** Ne katòbo-na ndaa rèngga-kiwe hida ahinana ana panunga-na, tàka ba lèngana pa-pamboto-wa Jezungge kaa wudi lolowe ba wa'i baandi hida Zurata dana larana Nia mòno ba hida baani. **17** Nia ka na ata mangeda awa'ina hètina, ba na-kaaula-ni Lazaru, ulouzo-wu wali rate dana ba hinani, mòno ba na-pakède-wa wali tilu ata mate, kaa zàkita-nawe larana. **18** Niawe nia ka na ata mangeda ka nètini alaa parèngga-wa, oro-nawe baa rèngewe ne tanda ba parawi-na Nia. **19** Nia ka hida wèki douna ata Parizi: Kai età matawe, nda'i baa ndalimi jèmingge. Patete-kongge, nètì mbolo baani ata mbàrana, hida.

### Ba natèki-we lara materia Maròmba Jezu

**20** Olena ata a-katekala pa-tambaja ne rame dana, wa'indi a-kapirana ata Nngarika. **21** Nètindi mbàrana Paliputa, ata Mbaitazainda, ne'e Nnggalelea dana, kaa dèngiwa: Mori, ka maeta-powa Jezu limangge, hidani. **22** Ka nètini Paliputa ateki-nawe 'jAndaria. Baangge ka nètindi j'Andaria baada Paliputa kaa tèki-nawe Jezu. **23** Nia ka hinandi Jezu ba nawale-wi: Rapa baanawe na Ana atapi'a baa pamboto-wa. **24** Lunggu tàka-nggumi, na ambolo pare ba nda ne'e-kuni tana dana ka namate, engangge ba mbolo do-douwa, tàka ba namate-dona nawua lànga-tàka. **25** Ba nggàra-kuni a-manàwara-ngge toleka-na, nia apòruwe, tàka ba nggàra-kuniambutungge ate toleka-na nèwe pònu tana, nia akarawa-we tuma-nawe toleka ndaa mbiata. **26** Ba nggàra-kuni ka pawata-ni ahinangga, ngga'i ka nadeku-ngga, mòno ne'e pane'e wa'ingga Zaua, ne'e wa'i kaini na apawata-nggalangge. Ba wa'i-kuni apawata-ngga, na-paaka-ni na 'jAma-langge. **27** Ne ba hinawe na-kalàlu-we atenggu, mòno àpako pa-wukuna patèki-nggu? O Ama, kouta-nggani na lòdo! Tàka nia pòngu-dowe ka kuduki-ngge ne lòdo. **28** O Ama, pamboto-kiwe ngaramu! hina. Baa nia ka àmengge li'i wali ljangita: Ku-pamboto baawe mòno enga pamboto kiapo-ngguwe-lacgge ahina. **29** Na ata mangeda awa'ina ne'e, baa rènge-wengge, na-kanggu-ruka-we hida. Wàdeka: Wa'ini papalewa apanewe dèngani, hida. **30** Nia ka pakède-nawe Jezu ba nawale-wi: Inda oro-kingguwe Zaua nia ka wa'ingge ne li'i, tàka oro-miwe jèmi. **31** Ne ba hinawe niawe ba piata-nawe tutuna nèwe pònu tana; ne ba hinawe niawe ba letoni nggjounga na abeingge pònu tana. **32** Tàka baa lèngana pa-keketa-wangga-langge, ne Zaua kutèngi kuawa ata mbàra-nggulangge. **33** Tàka ba hinangge, na-paeta-ngge ba pei pata-nawe lara matena nème-langge. **34** Nia kaa walewa ata mangeda: Parènge-ma zàme ne'e zurata uku, na Karetu ba enga ma-mànuni muri wali muri wali. Peinawe ne Wo'u, nda napakai-kiwe na Ana atapi'a baa keketa-wa ba lumungge? Nggàrani na Ana atapi'a? hidangge. **35** Nia ka hina-dawe Jezu: Nia-kidowe ne azodi kiana na awanggara ba wa'ini tilumi. Kjakongge pakako-mi ne ba wa'i-puni na awanggara mbàrami, ngga'i ka ndaa nggau-kanggumi kapòta; ba nggàra-kuni akako kapòta dana, nda napànde-kingge ba nggjeengge paaro wa'ina. **36** Ba wa'i-puni mbàrami na awanggara, kai waini na awanggara,

ngga'i ka wòla awànggara-wumi, hinangge. Ne niawe patèki-na Jezu, baa ka nètini a-mangeruna wali wa'i mbàrada.

## Lara inda pawaida ata Jawundi

**37** Làngo ka nalua pi-pi'a-kupundi tanda parawi-na Jezu aro matada, tàka engangge ba ndaa waini, **38** ngga'i ka na-tonggola-we li'ina nàti nambi Jazaja-na pahina baana: O Mori, nggàra baani awaingge ne parèngge-nanggama, mòno nggàrani pandou bowo wa'i-dani Umana Mjori, ba bina. **39** Niawe nia ka nda na-mapànde-kiwe baa pawai, oro-nawe pahina dòmona nambi Jazaja: **40** Na-pakabura-dandi matada, mòno na-pakàtula-dawe ateda, ngga'i ka ndaa età waikana matada, ka ndaa rèngga waikana ateda, ka ndaa ma-winggira-kana làpata ba ku-pazeindala-wi, ba bina. **41** Ne niawe patèki-na Jazaja ba lènga età baanawe mbotona mòno ba natèki-nawe larana. **42** Làngo ka hina-kowe, amangeda dòmo ata mato awaini, tàka ndaa bowo-kingge oroda ata Parizi, ngga'i ka ndaa weitaka-kandi wali uma pakàza. **43** Ne ba hida, oro-nawe baa mbei wa'ingge mboto awalina ata pi'a, inda pi'apo mboto awalina 'jAla. **44** Ka nawàndi-ngge li'ina Jezu: Ba nggàra-kuni awaingga, inda Zauaki pawaina, tàka Nàme apatuka-ngga, Nia. **45** Mòno ba nggàra-kuni aeta-wangga, età baanani Nàme apatuka-ngga. **46** Ne mainggu, ngga'i ka pa-mangewala-we ne pònu tana, ba nggàra-kuni awaingga, ngga'i ka nda engga-kani kapòta dana. **47** Mòno ba wa'ikuni arènge-nggawe patèki-nggu, tàka ba nda na-pamèndera-kowe, nda Zauaki atauni zala. Mala inda mai-kingguwe pataungge zala ne pònu tana, tàka palizu-we niawe. **48** Ba nggàra-kuni aweitaka-ngge mòno ndaa deimba-nggawe patèki-nggu, wa'ini atauni zala. Ne li'i patèki-nggu nia-dowe atauni zala nème ba kanduka-nawe-langge. **49** Mala ba inda wali ate dou-kingguwe ba kutèki-we, tàka nàme 'jAma apatuka-ngga Nia ajaa baangga li'i, ba àpa-kowe pa-wukuna patèki-nggu mòno pa-panewe-nggu. **50** Mòno kupànde-ngge ne li'ina ba niawe toleka ndaa mbiata. Niawe nia ka ngara hida patèki-nggu, ahina wa'ina patèki baanangga 'jAma, lunggu wa'i kaina ba kutèki-we.

## Ba nawano-dandi wa'ida ana panunga-na Maròmba Jezu

**13:1** Toma nda naduki-powe ne rame Paza, napànde-ngge Jezu ba natutu-we rapa-nawe ba na-wukuna pandiki wali nèwe pònu tana hèti mbàrana 'jAma. Ne ba lènga manàwara-nandi hida douna ane'ena pònu tana, ka na-manàwara-ndi làpata kanduka-nawe. **2** Tèngara mana'a nggèdewe. Na kambjàlika narengga baawa Junda Izakario anana Zimo, ka pazuuni Jezu ba hina. **3** Ne ba napànde-ngge Jezu na'i 'jAma ba na-patère ndòba baanandi lima danana, ne ba wali-nawe 'jAla mòno ba nètini abali mbàrana 'jAla, **4** nia ka nakède ba ne'eni amana'a, ka nakaingge kalàmbe-na; baa ka nadeke kamba ka nakète-ngge kòmbuna. **5** Na-lèngana paburi-we we'e pazango dana, nia ka na-katari-ngge ba nawano-dandi wa'ida ana panunga-na, ka naopi waidawe ne kamba kòmbu detana. **6** Naduki-ni Zimo Petura-ngge, nia ka hinangge Petura: Wo'uko awano-nggandi wa'inggu zaua Mori? hina. **7** Nia ka hinangge Jezu ba nawale-wa: Ne parawi-nggu Zaua, ne wo'u ndau pànde-kipongge ne ba hinawe, tàka baa enga pànde-dumuwe-langge, hina. **8** Ka taunawe Petura: Ndau wano ta-tàka-kinggandi wa'i-nggu-langge muri wali muri wali, hinani. Nia ka nawale-wa Jezu: Ba nda kuwano-kunggu ndau dana-kingga Zaua, hina. **9** Ka taunawe Zimo Petura: Mori, ngga'i ka nda tito-kada wa'inggu, tàka hida dòmo limanggu mòno katowa kainggu, hinani. **10** Nia ka hina-nawe Jezu: Ba nggàra-kuni ariwo baa nia-kiduwu wa'ina pawano, mala ba na-zingira mbolo baadowe wèkina. Ne jèmi zingira baana, tàka nda ngu ngara-nduka-kimi, bina. **11** Mala ba napànde-dongge ba nggàra-kuni awukuna papazuu-ni, niawe nia ka ndai ngu zingira ngara-nduka-kiwumi ka zupu hinangge. **12** Ba na-lèngana pawano-dandi wa'i-dangge, nia ka natauwe kalàmbe-na ka na-mandi'i bali, ka hinandi: Rjèngga-kadowe ne palunggu-nggumina? **13** Ne jèmi, Ngguru, bàka Mori, limingga, nia kaa hina pòngu tàka-nawe, mala ba Zaua tàka-dona. **14** Nia ka ne Zaua, Molimi, bàka Nggurumi, ba kuwano baa-du-nggumindi wa'imi, pandou-nawe ba limi wa'i kaina bai pawano wèkina wa'imi. **15** Mala ba kubowo baa-dunggumi pata, ahina wa'ina ne Zaua ba lunggu-nggumi, ngga'i ka limi wa'i kaina jèmi. **16** Lunggu tàka-nggumi, na paata nda

narei-kiwa Morina, mòno na pa-pazuru nda narei-kiwa nàme apazuru-ni.

**17** Bai pànde-dundi hida, maringi baamiwe bai liiduwi. **18** Inda jèmi kuaki pa-lungguna; kupànde-ngge ba nggàrandi papende-ngguna. Tàka ne ahinana, ngga'i ka na-tonggola-we ne li'i Zurata: Na anga'a-nggawe nga'anggu na-keketa-wa wa'ina, ka kutènda-wa ba hinangga, ahina. **19** Kutèki mema-ngguwe ne ba hinawe toma nda nadadi-powe, ngga'i baa, ba nadadi-we, kai pawai ba Zaua baa. **20** Lunggu ta-tàka-nggumi, na adeimbawa ba nggàra-kuni pa-patuka-nggu, Zaua baa padeimba-na mòno ba nggàra-kuni adeimba-wangga Zaua, Nia baana padeimba-na Nàme apatuka-ngga, hina.

### Ba nabuwe-wa Maròmba Jezu na ata apazuuni

**21** Na-lèngana pa-hinangge Jezungge ka na-zanduka-we atena, ka na-zàkita-ngge: Lunggu tàka-nggumi, na aia olemi nia apazuu-nggalangge, hina. **22** Nia ka hida ana panunga ka niapo baa pazèra wèkina, lamanga-dawe ateda oro inda pànde-dawe ba nggàra-kuni pa-hinana. **23** Nia ka na aia ana panunga-na Jezu, na pa-manàwara-na, ne'eni aànde baie kawana-na Jezu. **24** Nia ka na Zimo Petura, ka na-kamàdeka-ni: Utua-wa ba nggàrani pa-hinana, hinani. **25** Niawe nia ka na ana panunga ka na-mawinggira mbàrana Jezu: Nggàrani Mori, hinani. **26** Nia ka nawale-we Jezu: Na pa-wòbula-nggu a-kapibika mòno pajaanggu nia-dona. Nia ka na-wòbula-ngge a-kapibika, nadeke-we ka najaà-nawe Junda anana Zimo Izakario. **27** Nadeimba-we Junda ne a-kapibika-ngge, ka tama-nawe kambjà-lika atena. Baa ka hina-nawe Jezu: Ne pakàmbu atemu, pa-ngginggara-we, hina. **28** Tàka hida amana'a, nda'iki ia ata arèngga-we ba àpawe pakàmbu atena ka zupu hinani. **29** Wa'i-dona: U-wo'ina pa-wukuna pawainda nème lòdo rame, bàka: ujaani àpa-àpa ata ndengo hinani Junda na Jezu, ahina, oro-nawe ba nia Junda atèreni pandou oma. **30** Nadeimba-kiwe Junda ne a-kapibika-ngge ka ngu nètini alouzo; ka nggède-nawengge.

### Pata abo'u

**31** Na-lèngana palouzo Jundangge, nia ka hinangge Jezu: Ne ba hinawe na Ana atapi'a apamboto-wangge, mòno na 'jAla apamboto-wangge orona Nia. **32** Ne baa pamboto-wa 'jAla ne'e Niangge, nia ka na 'jAla ka na-pamboto kaiwa Nia-langge ne'e Nia douna, mòno nangu ngginggara baawe ba na-pamboto-wa. **33** Ba kuana-nggumi, nda pira baanawe ba wa'ingga mbàrami; wjewa-wangga-langge, mòno ahina wa'ina patèki-nggundi ata Jawundi, hèti panèti àtingga Zaua nda na-mapànde-kiwe bai dukingge ne jèmi ba lunggu-ndina, lunggu wa'i kainggumi ne ba hinawe. **34** Li'i bo'u pajaa-nggungumi: Ngga'i kai pa-manàwara. wèkina; ahina wa'ina ba ku-manàwara baanggumi, ngga'i kai pa-manàwara wèki kaina jèmi. **35** Niawe nia kaa pànde ndòba-nggumi ba ana panunga-nggunggu-mi, ba wa'i-dongge pa-manàwara wèkimi.

### Ba natèki ulu wa'iwe Maròmba Jezu kedena Pjetura

**36** Nia ka hina-nawe Zimo Petura: Mori, nggjeengge pa-wukuna pakako-mu hina. Nia ka nawale-wa Jezu: Hèti panèti àtingga, nda na-mapànde-kiwe bau dekungga ne ba hinawe, baalangge enga deku-dumungga, hina. **37** Ka taunawe Pjetura: Mori, àpa nia ka nda na-mapànde-we ba kudeku-nggu ne ba hinawe? Enga taungguwe wèkinggu oro lumu dènga-nggunggu-langge, hinawe. **38** Nia ka nawale-wa: Enga taungguwe wèkinggu oro lumu dènga-nggunggulangge, lumungga? Lunggu tàka-nggumi, ba ndaa kukupo manu, mbàda patòlu wunda baamungga bau kedengga, hina.

### Ba na-pamalèna-dawe ateda ana panunga-na Maròmba Jezu

**14:1** Ngga'i ka nda na-zanduka dènga-kangge atemi; wjaini Ala, wjai kaingga Zaua. **2** Ne'e umana Amanggu nalua-ndi pandou; ba ndaa hina-donawe, nia piangge kutèki baa-nggumiwe, mala ba nètì-dongga apati-ndanggumi pandou hèti. **3** Ba lunggu hètì-langge mòno ba ku-lèngana pa-patinda baa-dunggumi pandoumi, enga àme-dongga abali-langge padeke-wumi, nia ka ku-marènga-nggumi, ngga'i ne'e pandou pane'e



wa'ingga, ka ne'e kainggumi jèmi. **4** Mòno hèti panèti àtingga pjàndeni larana, hinandi. **5** Nia ka hina-nawe Tjoma: Mori, nda mapànde-kingge baa nggjee nèti nianggu, pei pata pànde-komani nàti lgra, hina. **6** Nia ka hina-nawe Jezu: Zaua-dona na lara, ne abia mòno ne toleka. Nda'iki ia ata aduki mbàrana 'jAma, wàte-nawe ba nalara-ngga Zaua. **7** Bai pànde pia-mongga Zaua, enga pànde baamini Amanggu. Walingge ne ba hinawe pjànde-ningge mòno 'jeta-wangge, hina. **8** Ka taunawe Paliputa: Ubowo-ko-nggamani 'jAma, Mori, natutu baawe ne zàme, hinani. **9** Ka hina-nawe Jezu: Ee Paliputa, ngga'i baawe mando'i-nawe ba engangga mbàramu mòno ndau pànde-kipongga? Ba nggàra-kuni aeta baawangga Zaua, età baanani 'jAma. Peina ubowo-nggamani na 'jAma, ka nia lumu-wangga? **10** Ndau waikingga Zaua ba ne'engga 'jAma, mòno na 'jAma ba ne'eni Zaua? Ngara patèki-nggungumi, inda wali ate dou-kingguwe ba kutèki-we. Na 'jAma aengana ne'e Zaua Nia arawi-ndi parawi-na. **11** Wjaingga ne Zaua ba ne'engga 'jAma mòno na 'jAma ba ne'eni Zaua, màka ba indako wjaikongge oroda hèti parawi baa. **12** Lunggu tàka-nggumi, ba nggàra-kuni awaingga, hèti parawi-nggu Zaua, hina kaindi nia-langge mòno na-kalada-pundi parawi-na nia-langge mbuu hida, mala ba nèti-dongga ne Zaua mbàrana 'jAma. **13** Mòno ba àpa-kowe padèngi-mi bai wainggawe ngaranggu, kudeku-ngge, ngga'i kaa pamboto-wa na 'jAma orona na Paana. **14** Ba wa'iko padèngi-mingga bai wainggawe ngaranggu, kudeku-ngge ne Zaua.

## Ba na-pakira-dani Ngjau Matua

**15** Bai manàwara-dongga Zaua, enga pa-mèndera-minggandi li'i-nggulangge. **16** Mòno ka kudèngi-wa 'jAma ne Zaua, ka najaa-nggumi Patjulu eka, ngga'i ka naole-nggumi muri wali muri wali. **17** Nia-dona na Ngjau pandou-nawe abia, nda papiaku padeimba-nawe ne pònu tana oro-nawe ba nda naeta-wa mòno ba nda natanda-wa. Tàka tjandawa ne jèmi, mala ba enga-duni mbàrami mòno ne'eni jèmi-langge. **18** Nda ku-dundaka-kinggumi bai ana lalo, enga àme-dongga mbara-milangge. **19** Nda pira baanawe ba ndaa zulu eta-kiwangga ata pònu tana-langge, tàka

'jeta-wangga ne jèmi, mala ba ku-toleka-dona, nia ka enga toleka kaimi jèmi-langge. **20** Na lòdo nia bai pjàndengge, ne Zaua ba ne'engga Amanggu, mòno ne jèmi ba ne'e-nggumi Zaua, mòno ne Zaua ba ne'engga jèmi. **21** Ba nggàra-kuni atèrendi li'inggu mòno a-pamèndara-ndi, nia a-manàwara-ngga; mòno na a-manàwara-ngga, pa-manàwara-donani Ama-nggulangge, mòno ku-manàwara dòmomi ne Zaua, nia ka ku-patingo wèkina mbàrana, hina. **22** Ka taunawe Junda, nda niaki Izakario: Peina Mori, ka nia mbàra-wamawe ne zàme pa-wukuna pa-patingò wèki wa'imu, ka nda mbàra-nawe nèwe pònu tana, hinani. **23** Nia ka nawale-wa Jezu: Ba wa'i-duni a-manàwara-ngga, enga pa-mèndera-nanggawe li'inggu, nia ka na Amanggu na-manà-wara-nilangge, mòno àme-nggama andou wa'i mbàrana. **24** Na ndaa manàwara-ngga, nda na-pamèndera-kinggandi li'inggu; mòno ne li'i parènge-mi, inda li'i-kingguwe Zaua, tàka li'i-nawe 'jAma apatuka-ngga. **25** Hida kutèki baa-nggumindi ba enga-pongga mbàrami. **26** Tàka na Patjulu, na Ngjau Matua, pa-patuka-nanggumi 'jAma-langge oro ngaranggu, Nia-langge apanunga ku-kua-nggumindi mòno apalolo-nggumindi ngara patèki-nggungufni-na. **27** Mòli niawe pabèli-nggungumi, ne moli oronggu Zaua pajaa-nggunggiimi. Ndaa hina-kinawe ne pajaana pònu tana, ne pajaa-nggungumi Zaua. Ndai zanduka ate dènga-kangge mòno ndai mandauta-kana. **28** Rjènge baawe: Nètingga akako mòno enga balinggu mbàrami, ba lunggu-nggumi. Bai manàwara pia-mongga, nda napakai-kiwe bai ndeta ate dèngangge ba nètingga mbàrana 'jAma, mala na 'jAma ba narei-dowangga Zaua. **29** Kutèki ulu wa'i baa-nggumiwe ne ba hinawe, ba nda nadadi-powe, ngga'i ba nadadi-welangge kai pawai. **30** Nda ku-palua baangge ba ku-panewe dènga-nggumi, mala na beinawe pònu tana àme baani, mòno nda'iki àpa-àpa pakole-nangga. **31** Tàka ne ahinana ngga'i ka napànde-ngge pònu tana ba ku-manàwara-ni 'jAma, mòno ba kuliawe ne ahinana patèki-nangga 'jAma. Kjède-wumi, dainda wali wa'i nèwe, hina.

[Na anggura pia tàka](#)

**15:1** Zaua-dona na anggura pia tàka, mòno na Amanggu nia atau oma. **2** la

lolo ia lolo ane'ena Zaua ndaa wua, nakaini mòno ia lolo ia lolo awua, na-pazinggo-wa, ngga'i ka nètì kiani ba nawua. **3** Ne jèmi zinggo baana, oro-nawe ne li'i patèki-nggunggumi-na. **4** Ngga'i ka enga-nggumi ne Zaua, nia ka Zaua ka engangga ne jèmi. Ahinana lolona ba nda nawua wèki douna, ba nda enga duwu-konani pu'u anggura, limi wa'i kaina jèmi ba nda enga-kunggumi Zaua. **5** Zaua-dona na anggura, jèmi lolo-nanggumi. Ba nggàra-kuni aenga duwungga Zaua, mòno Zàua ka enga duwu-nggumi nia, nia awua làngu-tàka; mala ba nda Zauako ndai pàndeki pa-rawina àpa-àpa. **6** Ba nggàra-kuni ndaa enga duwungga Zaua, akapèti-ni nggjpu-nga, ahinana na lolo, ka namate, baa kaa pakua-ndi ata kaa tumbandi api dana, kaa kàrana. **7** Ba enga duwu-dumingga Zaua mòno hida patèki-nggu ba enga nia-dundi ate danami, dèngi-kowe ba àpa-kowe pakàmbu atemi, enga dadi-doda-nggumi-langge. **8** Ne niawe pa-pamboto dèngawa 'jAma, bai wua làngu-tàka, nia ka ana panunga-nggunggumi-langge.

### Ngga'i ka enga nia-nggumi manàwara-nggu, ba hina Maròmba Jezu

**9** Ahinana ba na-manàwara-ngga 'jAma, lunggu wa'i kaina ba ku-manàwara-nggumi; ngga'i ka enga ndoumiwe ne manàwara-nggu. **10** Bai pa-mèndera-donggandi li'inggu, enga ndoumiwe ne manàwara-nggu, ahinana ne Zaua ba ku-pamèndera baanandi li'ina Amanggu, nia ka enga ndoungguwe manàwara-na. **11** Kutèki baa-nggumindi hida ahinana, ngga'i ne ndeta ate oronggu ka ne'engge mbàrami, mòno ngga'i ka na-tonggola-we ndeta atemi. **12** Ne niawe ne li'inggu ngga'i kai pa-manàwara wèkina ahinana ba ku-manàwara baanggumi. **13** Nda'iki ata arei manàwara-na nia-kidona na ajaa wèkina oro lumu dènga-nandi kandua-na. **14** Kandua-nggunggumi, bai liiduwi pa-pana'u-nggunggumi ne Zaua. **15** Paangu-wi inda lunggu baa-kinggumi, mala ahinana paangu nda napànde-kingge ba àpako parawi-na monna; tàka kandua lunggu baanggumi ne jèmi, mala ngara parènge-nggumi 'jAma ba kubowo baa-du-nggumindi. **16** Nda jèmiki apende-wangga Zaua, tàka Zaua apende-wumi jèmi mòno ku-keketa-wumi, ngga'i kai kako-wumi kai wua-wumi, mòno ne wuami ngga'i.ka enga ma-mànungge, ngga'i ba àpako padèngi-mini

'jAma bai wainggawe ngaranggu, ka najaa-nggumiwe. **17** Hida kutèki-nggumindi, ngga'i kai pa-manàwara wèkina, hinandi.

### Baa mbutundi ate pònu tana

**18** Baa mbutu-kunggumi ate ata pònu tana, ngga'i kai pàndengge baa mbutu ulu wa'ingga ate Zaua. **19** Ba wali pia-mumiwe pònu tana, nia ka ne pònu tana enga manàwara-nandi tutu douna. Tàka oro-nawe ba nda wali-miwe pònu tana, ba Zaua apende baawumi wali ne pònu tana, niawe nia kaa mbutu-nggumi ate pònu tana. **20** Ljolowe ne li'i patèki baa-nggunggumi-na: Na paata nda narei-kiwa morina ba lunggu. Baa kalemata baa-dowangga ne Zaua, nia ka enga kalemata kai-danggumi jèmi-langge; baa deku baa-donggawe ne li'inggu, nia kaa deku kai-nggumiwe ne li'imi jèmi-langge. **21** Tàka ngara hida apawèna-nggumindi-langge oro-nawe ngaranggu, mala ba ndaa tanda-dowa na Apatuka-ngga. **22** Ba nda kumai piamo mòno ba nda ku-panewe dènga pia-mundi, nda'i tàkaki zalada, tàka ne ba hinawe nda'iki pandou todi dènga-dawe zalada. **23** Ba nggàra-kuni ambutungga ate, mbutu ate kainani Amanggu. **24** Ba nda kurawi pia-mundi tiluda hèti parawi-nggu panda parawi pònguna ata eka, nda'i tàkaki zalada; tàka ne ba hinawe aeta baawe mòno ambutu dòmo-nggama ate Zaua baama Amanggu. **25** Tàka ne ba hinawe ngga'i ka 'na-tonggola-we ne amaaila zurata uku danada: Ne baa mbutungga ate, nda'iki pambutu ate dènga-dangga, ahina. **26** Tàka ba kolena pa-àmeni nàme Patjulu, pa-wukima pa-patuka-nggunggumi wali mbàrana 'jAma, na Ngjau pandou-nawe abia, alouzo wali 'jAma, Nia azàkita-nggawe lara-nggulangge; **27** mòno jèmi dòmo azàkita kai-nalangge, mala bai ole-dongga walingge kawunga-na.

**16:1** Ngara hida kutèki-nggumindi, ngga'i ka ndai winda dènga-kangge. **2** Aweitaka-nggumi wali uma pakàza-langge, beengge àmengge rapa-nawe-langge ia ata ia ata apamate-wumi, pa-maraka-ngguni. 'jAla ba hinawe pa-pangèda-na. **3** Ka zupu hidangge, oro-nawe ba ndaa tandawa 'jAma, mòno ba ndaa tanda kaingga ne Zaua. **4** Tàka palunggu dènga-nggundi,

ngga'i baa, ba naduki-we rapana, kai lolowe ba kutèki baa-nggumindi ne Zaua. Tàka nda kutèki-ki-nggumindi walingge kawunga-na, mala ba ne'e-dongga mbàrami.

## Pata pawili-na Patjulu

**5** Ne ba hinawe nètingga hèti mbàrana Nàme apatuka-ngga, tàka nda'iki ia ne jèmi atua-wangga: Nggjee kako niamu, ahinangga. **6** Tàka oro-nawe ba lunggu-nggumindi hida, niawe nia ka na-kalàlu kalu-luawe atemi. **7** Tàka kutèki-nggumiwe ne abia, màngu ndali pòngu-nawe ne jèmi ba kukako-wangga hèti. Mala ba nda kukako-kowangga, nda na-mapànde-kiwe nàme Patjulu ba àmeni mbàrami. Tàka ba kukako-dowangga, nia ka ku-patuka-nggumini mbàra-mila-nggev **8** Ba lèngana pa-àmeni Nia-langge, nia ka nabowo-nawe pònu tana lara-nawe zala mòno lara-nawe ne atindina, mòno lara-nawe ba piata panewe. **9** Lara-nawe ne zala, oro inda wai wa'i-dangga Zaua. **10** Lara-nawe ne atindina, ne ba kukako-wangga mbàrana 'jAma mòno ndai età baawangga. **11** Lara-nawe piata panewe, ne baa wjata baanawe tutuna na abeingge pònu tana. **12** Nalua dòmo-pundi pa-wukuna patèki-nggunggumi niangge, tàka ndai duka-kipundi ne ba hinawe. **13** Tàka ba lèngana pa-àmeni Nia, na Ngjau pandou-nawe abia, nabowo-nggumi lara kai pànde mbolongge ne ahina tàkana. Mala ba nda wali ate dou-kinawe ba na-panewe-langge, tàka hidime parènge-na nia-duwi patèki-na mòno natèki-nggumindi awukuna padadi-langge. **14** Nia apamboto-wangga-langge, mala ba nadeke-dowe wali dounggu, ka natèki-nggumiwe jèmi-langge. **15** Ngara douna 'jAma, dou-nggundi Zaua, niawe nia ka, nadeke-dowe wali dounggu ka natèki-nggumiwe jèmi-langge, ba lunggu-nggumi.

## Lara-nawe ne kalàlu akabali ndeta ate-langge

**16** Inda pira baa-kinawe ba ndai eta-wangga, mòno inda pira dòmo kia-kinawe bai eta-wangga, hina. **17** Nia ka hida wàdeka ana panunga-na ka hida wèki douna: Peinawe pata-nawe ne pa-hinana-nda: Inda pira

baa-kinawe ba ndai etawangga, mòno inda pira dòmo kia-kinawe bai eta-wangga. Mòno: Ne ba kukako-wangga mbàrana 'jAma ba hina, hida.

**18** Nia ka taudawe: Peinawe, inda pira baanawe ba hina. Nda tarèngga-kiwe ne pakàmbu atena, hida. **19** Nia ka narèngga-we Jesu baa wukuna patua-wa. Ka hina-dawe: Ne'e-nggumi apanewe wèki douna oro-nawe: Inda pira baa-kinawe ba ndai eta-wangga, mòno inda pira dòmo kia-kinawe bai eta-wangga, ba lunggu-nggumi? **20** Nia ka lunggu tàka-nggumiwe: Enga ngi'o-dumi mòno enga kawauka-dumi-langge, tàka ne pònu tana nandeta-we ate-nalangge; kaljàlu-wumi ne niangge, tàka ne kalàlu-mi enga kabali-donawe ndeta ate-langge. **21** Ahinana mawine, ba na-karòduka paana, enga kalàlu-na ne niangge, mala ba rapa baa-donawe. Tàka ba na-lèngana pa-paana-ni na lakawa-ngge, nda nalolo wa'i baawe karòduka-nangge, oro ndeta atena ba lènga dadi baanawe ia ata pònu tana.

**22** Hina kaiwe ne jèmi bai kalàlu-wumi ne ba hinawe. Tàka enga totoka bali-du-nggunggumi, nia ka nandeta-we ate-milangge, mòno nda'iki aparewo-nggumiwe ndeta ate-milangge. **23** Ne lòdo-langge nda'iki patua-mingga. Lunggu tàka-nggumi, ba wa'iko padèngi-mini 'jAma, enga jaa-nanggumi oro-nawe ne ngaranggu. **24** Làpata ne ba hinawe ndai dèngi-kipo àpa<sup>2</sup> bai wainggawe ngaranggu. Djèngi-wumi, enga kolemi, ngga'i ka na-tonggola tàkawe ne ndeta atemi. **25** Ngara hida kutèki wai-nggumindi li'i tuda; wa'ingge rapa-nawe, ba nda kuwai-nggumi: li'i tuda ba ku-panewe dènga-nggumi, tàka ba kutèki ailolo-nggumiwe larana na 'jAma. **26** Na lòdo-langge midèngi waingge ngaranggu, mòno ne Zaua, ka kudèngi-dawe tutuda mbàrana 'jAma, inda lunggu-kinggumi. **27** Mala na 'jAma douna ba na-manàwara-dunggumi, oro-nawe bai manàwara-ngga ne Zaua mòno bai pawai baa ba wali àmengguwe 'jAla. **28** Wali àmengguwe 'jAla, ka kumai nèwe pònu tana; ku-dundaka dòmongge ne pònu tana ka nètingga hèti mbàrana 'jAma, hina. **29** Ka taudawe ana panunga-na: Ueta-ko, ne ba binawe utèki ailolo baawe, ndau wai baana li'i tuda. **30** Ne ba hinawe mapànde-nggu bau pànde mbo-mbolongge, mòno òmana ba tuawu ne Wo'u. Ne niawe ka mawainggu ba wali àmemuwe 'jAla, hidani. **31** Nia ka nawale-wi Jesu: Pawjai baa ne ba hinawe? **32** Patjete-kona, àmengge rapana, mòno rapa baanawe, baa pòwara



wumi-langge hèti paaro dou paaro doumi ia ata ia ata, bai dundaka kanua-ngga. Tàka nda kutito-ki, mala ba wa'i-duni aolengga, na 'jAma. **33** Ngara hida kutèki baa-nggumindi, ngga'i ka wa'ingge pa-malèna ate dèngami oronggu Zaua. Ne ba ne'e-nggumi pònu tana 'jeta mawila. Tàka pa-mjàndungo-we atemi, ne Zaua ba lènga talu baangguwe ne pònu tana, hina.

## Na tambaja-na Maròmba Jezu

**17:1** Hinangge Jezu-nangge nia ka na-keketa-wi matana bjondo, ka hinangge: O Ama, rapa baanawe; pamboto-kiwa Anamu, ngga'i na Anamu ka na-pamboto-wu Wo'u. **2** Ahinana bau aila baanawe mboto pamboto-ndi ngara dadi ata, ngga'i ngara pajaa-muni ka najaa-dawe toleka ndaa mbiata. **3** Ne niawe ne toleka ndaa mbiata, baa tandawu Wo'u, Ala ania waina, ahina tàkana, mòno Jezu Karetu pa-patuka-mu. **4** Ne Zaua, ku-pamboto baawu ne pònu tana, ku-patonggola baawe ne pawili pa-patanggu-mungga, kau wilingge pa-lumungga. **5** Mòno ne ba hinawe, Wo'u Ama, kau pamboto-wangga ne'e mbàramu, ahinana mboto padounggu ne'e mbàramu hètina ba nda nadadi-powe tana. **6** Kubowo baadawe ngaramu hida ata pajaa-mungga wali ne pònu tana. Doumundi Wo'u, baa ka mujaa-nggandi Zaua mòno a-pamèndera baangguwe li'imu. **7** Ne ba hinawe apànde baangge, ngara-ndukada hèti pajaa-mungga, baawali wa'i-nandi mbàramu. **8** Mala hèti li'i pajaa-munggana ku-paduki baadandi, mòno adeimbawi mòno apànde ta-tàkangge ba wali àmengguwe mbàramu, mòno awai baangge ba Wo'u apatuka-ngga. **9** Tutu-dawe hida ba ku-tambaja-wangga; nda tutu-kinawe pònu tana ba ku-tambaja-wangga, tàka tutuda ata pajaa-mungga, mala ba lènga doumundi Wo'u. **10** Ngara dounggu Zaua, doumundi Wo'u, mòno ngara doumu Wo'u, dounggundi Zaua, mòno pa-pamboto baa-wangga oroda hida. **11** Inda ne'e baangga pònu tana ne Zaua, tàka engandi pònu tana ne hida, mòno àtingga mbàramu ne Zaua. O Ama amatua, kau nggòlu waidawe ne ngaramu pajaa-mungga, ngga'i ka iandi ahina wa'ina ne hito. **12** Ba enga-pongga mbàrada kunggòlu waidawe ngaramu pajaa-mungga, mòno kudawa baawi ka nda'iki ia oleda amuana,

nia-kidona nàti andoungge ambangata, ngga'i ka na-tonggola-we ne li'i Zurata. **13** Tàka ne ba hinawe àtingga mbàramu, mòno ne ba kutèki-wi hida ne pònu tana, ngga'i ne deta ate oronggu Zaua ka na-tonggola ta-tàkawe ate danada. **14** Ku-paduki baadawe ne li'imu, nia kaa mbutundi ate pònu tana, oro-nawe ba nda wali-dawe pònu tana, ahinana ne Zaua ba nda wali-ngguwe pònu tana. **15** Ngga'i kau dekewi wali nèwe pònu tana inda lunggu-kinggu, nia-kidowe ngga'i kau nggòluwi lunggunggu, ka nda napiaku-kandi bjokala. **16** Nda wali pònu tana-kiwi, ahinana ne Zaua ba nda wali-ngguwe pònu tana. **17** Pa-matua waidawe ne abia. Ne li'imu niawe abia. **18** Ahina wa'ina bau patuka-ngga nèwe pònu tana, lunggu wa'i kaina ba ku-patuka-ndi pònu tana. **19** Oro lumu dènga-nggundi hida nia ka ku-pamatua wèkina, ngga'i ne hida kaa pa-matua waidawe ne abia. **20** Nda tutu kanua-kidawe hida ba ku-tambaja-wangga, tàka tutu kaidawe hida awukuna pawai wa'ingga oro-nawe ne li'i pangindi-da. **21** Ngga'i ka ia ndòbandi, ahinana ne Wo'u Ama ba ne' enggu Zaua mòno ne Zaua ba ne'engga Wo'u, ka hida kaina ba ne'endi hito, ngga'i ne pònu tana ka napawai ba Wo'u apatuka-ngga. **22** Ne mboto pajaa-mungga, kuaila baadawe, ngga'i ka iandi ahinana ba ianda ne hito. **23** Ne Zaua ne'engga hida, mòno ne Wo'u ne'engga Zaua, ngga'i ka pa-tonggola tàka-dawe ba iandi, ngga'i ne pònu tana ka napànde-ngge ba Wo'u apatuka-ngga mòno bau manàwara-ndi ahinana bau manàwara baangga Zaua. **24** O Ama, kumbeingge, ne pane'e wa'ingga Zaua, ngga'i ka ne'e wa'i kaindi mbàranggu hida ata pajaa-mungga, ngga'i kaa eta-nggawe ne mbotonggu pajaa baamungga, ba lènga manàwara baamungga hèti ba nda nia-kipowe kawunga dadi tana. **25** O Ama atindina, ne pònu tana nda natanda-kiwu, tàka ne Zaua kutanda-wu, mòno ne hida apànde baangge ba Wo'u apatuka-ngga. **26** Mòno kubowo baadawe ne ngaramu, mòno enga bowo kia-nggudawe-langge, ngga'i ne manàwara pa-manàwara waimungga ka engangge mbàrada, mòno ne Zaua ka enga nia kaingga ne hida.

[Lara wòpa-dani Maròmba Jezu ne'e Nggezemane](#)

**18:1** Lèngana pa-hinangge Jezu-nangge, nia ka nalouzo pàngu ana

panunga-na hèti mbali ana loko Kendora. Wa'ingge kalowi ne'e, nia ka natama wa'i Jezu pàngu ana panunga-na. **2** Tàka na Junda awukuna papazuu-ni, napànde kaingge ne pandou, mala na Jezu ba nakàli pakua dènga wa'i baadundi ana panunga-na ne'e. **3** Nia ka àmeni Junda a-marèngana akazumbu kazòlondandu mòno atada rato2 kalada mòno ata Parizi, baa ngindi ilu, rewo mòno atama. **4** Nia ka ba lènga pànde-nawe Jezu ngara awukuna padadi wèki detana, ka natuke: Nggàrani pawewa-mi ka hinandi. **5** Jezu ata Nazareta, hidani baa walewa. Ka hina-dawe Jezii: Zaua baana, hina. Nia ka na Junda apazuuni Jezu ne'eni andende ole dèngandi. **6** Nia ka ne Zaua baana, ba hinandi Jezungge, kaa ngu eruna ka mbème hida tjana. **7** Nia ka natua dòmowi Jezu: Nggàrani pawewa-mi, hinandi. Jezu ata Nazareta, hida baa walewa. **8** Ka pawale-na Jezu: Zaua baana, lunggu baa-nggumina. Ba Zauako pawewa-mi, pilindi hida kaa kako, hina. **9** Ne ahinana ngga'i ka na-tonggola-we ne li'ina: Hida pajaa-mungga nda'iki ia papòru-nggu, ba hinangge. **10** Nia ka na Zimo, Petura pa-hidana, amàngu tekona, ka ngu ziriku-nawe tekona, ka nangu lòpuni na atana na Rato Kalada, ka na-katèri-nani katilu kawana-na. Na ata Mjäluka-we ngarana. **11** Ka taunawe Jezu: Pawàno-we ne tekomu, namoda-mowe ba nda kuenu-ni na koba we'e pajaa-nangga Amanggu? hinani Pjetura.

### Ba aro-nani 'jAna Maròmba Jezu. Lara kedena Pjetura

**12** Nia ka hida kazòlondandu mòno na kjondo rata mòno atana ata Jawundi awòpawa Jezu kaa kèteni, **13** baa kaa ngindi uluwa mbàrana 'jAna, mala ba wera-donani Kajapa aRato Kalada ne ndou. **14** Na Kajapa nia-dona apalolo-ndi lara ata Jawundi-na: Màngu lara-nawe ba namate ia ata tutuna atana Mjori ahina. **15** Nia ka na Zimo Petura mòno na aia dòmo ana panunga adekuni Jezu. Na ana panunga aia papànde-nani Rato Kalada, nia ka natama ole dèngani Jezu ne'e natara danana Rato Kalada. **16** Tàka na Pjetura ne'eni andende nggjounga aro bina, baa ka nalouzo na ana panunga papànde-na Rato Kalada ka na-panewe dèngani na mawine akandi bina. Baa ka natama ngindiwa djana na Pjetura. **17** Nia ka taunawe na

mawine akandi bina: Àngu wo'u kaina oleda ana panunga-na nàti ata, hina-nawe Pjetura. Nia ka: Indaki, hina. **18** Nia ka hida atana Rato Kalada mòno lakawa pa-pawende-na apowi baa api ba lènga kalika, ka ne'endi aduruna; na Pjetura ka ne'e kaini aduruna api mbàrada. **19** Nia ka na Rato Kalada natua-wa Jezu larada ana panunga-na mòno ne pa-panunga-na. **20** Nia ka nawale-wa Jezu: Ne Zaua nda kuuri-kingge ba ku-panewe nèwe pònu tana. Àngu engu wa'i-dongga nème uma pakàza mòno uma Ala ba ku-panungana, pandou pa-pakua wa'i ndòbana ata Jawundi; nda'iki ia patèki kabuni-nggu. **21** Àpa nia kau tua-wangga? Tuawa nàme ata arènge-nggawe patèki-nggundi. Ne hida apànde ndòbangge patèki-nggu, bina. **22** Lèngana pa-hinangge-ngge, na aia lakawa pa-pawende andende ne'e, ka natòba-nawe matana: Lumu wa'iwu bau walewa na Rato Kalada? hinani. **23** Nia ka nawale-wa Jezu: Ba nazala-kowe ne patèki-nggu, utèki-nggawe ne azala, tàka ba na-mawèna-dowe, àpa nia kau tòba-wangga? bina. **24** Nia ka na 'jAna ka na-patuka mangu kalère-ni mbàrana Kajapa, Rato Kalada. **25** Tàka na'i Pjetura ne'e-puni aduruna api, ka hidani ata: Àngu wo'u kaina oleda ana panunga-na nàti ata, hida. Tàka nakede-ngge: Indaki, hina. **26** Nia ka taunawe na aia oleda hida atana Rato Kalada, aole dadini na ata pa-katèri-na katilu-na Pjetura-na: Nda kueta-kiwu ne'e oma dana ba ole-mina? hina. **27** Nia ka nakede pi'a dòmo Pjetura, ka ne mema pòngu kaa ngu kuku manu.

## Ba aro Pilatu-wa Jezu

**28** Baa kaa ngindiwa Jezu wali wa'i mbàrana Kajapa hèti uma piata panewe, kapu nggède ngga-nggarowe. Tàka hida ata Jawundi douna ndaa tamaki ne djana, ngga'i ka ndaa wèna-kana diraka kaa piakuna panga'a-ngge Paza. **29** Nia ka nalouzo Pilatu mbàrada: Àpa pakàla-mini na ata, ka hinandi. **30** Nia ka hidani baa walewa: Ba nda ata diraka-dowa na ata nda ma-patère-kingguni, hida. **31** Ka hinandi Pilatu: Dj'ekewa kai tauni zala dekungge ne li'i ukumi, hina. Ka taudawe ata Jawundi: Ne zàme nda mamboto-kingge pa-pamate ata, hida. **32** Ne ahinana ngga'i ka na-tonggola-we patèki-na Jezu ba nabowo-dawe, ba wukuna papei

pata-nawe ba namate. **33** Nia ka natama bali na Pilatu ka napamai-wa Jezu, ka- hina-nawe: Wo'u na Zangandi-na ata Jawundi? hina. **34** Ka nawale-wa Jezu: Wali ate dana doumuwe bau tèkiwe ree, àngu wa'i eka atèki-ngguwe ne tutunggu? hina. **35** Nawale-wa Pilatu: Ata Jawundi-wangga ne zaua? Ole dou-dumuni mòno rato2 kalada apatère-nggu. Àpawe parawi-mu? hina. **36** Ka nawale-wa Jezu: Ne zangandi-nggu Zaua nda wali-kinawe ne pònu tana. Ba wali pònu tana pia-mowe ne zangandi-nggu, enga patau baada kazòlondandu-nggu, ngga'i ka ndaa patère-kangga mbàrada ata Jawundi, tàka ne ba hinawe ne zangandi-nggu nda wali-kinawe nèwe pònu tana, hina. **37** Ka hinani ilatu: Ka zangandi kaiwu ne nia? hina. Ka nawale-wa Jezu: Ahina tàka-donawe patèki-mu, zangandi-wangga. Niawe nia ka kudadi-wangga mòno nia kaidowe ka àmengga nèwe pònu tana, ngga'i ka ku-zàkita-ngge ne abia; ba nggàra kuni awali wa'i ne abia narènge-nggawe li'i-nggungge, hina. **38** Ka pakède-nawe Pilatu: Àpa-kowe ne abia? hina. Ijèngana pa-hinangge-ngge ka nalouzo dòmo mbàrada ata Jawundi ka hina-dawe: Nda'i pònguki zalana pakole-ngguni ne zaua. **39** Tàka wa'i baangge pata pajaa-wumi, ba ku-pazèla-nggumini aia ata ba rame Pazawe: Mbjeidongge ba ku-pazèla-nggumini zangandi ata Jawundi? bina. **40** Nia ka ne'e dòmondi akawaro: Ka nda Nia-kana, ka nia Mbjaramba, hida. Ka na Mbjaramba ata kabukuta-wa.

## Ba naeta mawila Maròmba Jezu

**19:1** Baangge na Pilatu kà na-patuka-ngge ngindiwa Jezu, ngga'i ka mbolewa, ba hina. **2** Nia ka hida kazòlondandu kaa wanani katipa tara kaa ta'i-nani katowa detana, mòno kaa pawèna-nawe kalàmbe zunda rangga. **3** Baa kaa tukewa: Oza-mumungge, zangandi ata Jawundi, hidani, kaa tòba-tòba-nawe matana. **4** Ka nalouzo dòmo Pilatu, ka hinandi: Patjete-kona, kulouzo ngindi-nggumini mbàrami, ngga'i kai pàndengge ba nda'i pònguki zalana pakole-ngguni, hina. **5** Nia ka àmeni Jezu alouzo, màngu katipa tarana, màngu kalàmbe zunda ranggana, ka hinandi Pilatu: Pa-tjetena, na atapi'a. **6** Ne baa etawa rato2 kalada mòno hida ata pa-pawende, kaa ngu kawaro: Wòndawa, wòndawa, hidangge. Nia ka

hinandi Pilatu: Djeke-kowa ne jèmi, kai wòndawa. Mala ne zaua nda'iki zalana pakole-ngguni, hina. **7** Nia kaa walewa ata Jawundi: Ne zàme wa'ingge li'i uku, mòno dekungge ne li'i uku, enga pamate-powa, oro-nawe Ana-nangga 'jAla ba hina, hida. **8** Ne ba narènge-we Pilatu ne patèki-da ahinana-ngge ka àti kiangge mandauta-na. **9** Ka natama dòmo ne'e uma piata panewe, ka hina-nawe Jezu: Nggjeengge pawali-mu? hina. Tàka na Jezu nda'iki pawale-nani. **10** Nia ka hina-nawe Pilatu: Ndau nauki pa-panewe dèngangga, ne zaua? Ndau pànde-kingge ba kumboto pawònda-wu? hina. **11** Ka nawale-wa Jezu: Ndau mboto pòngu-kingga zodi ba ndaa jaa pia-mungguwe wali bjondo. Niawe nia ka na apatère-ngga mbàramu, àti-pongge zalana, hina. **12** Liingge hina-nggengge, nia ka na Pilatu ka nawewa lara pa-pazèla-wa Jezu. Tàka akawaro ata Jawundi: Bau pazèla-kowa na ata-langge, nda kandua baananggu zangandi kalada. Ba nggàra-kuni zangandi-wangga ahina, nggòba baanani zangandi kalada, hida. **13** Ba na-lèngana parenge-we Pilatu ne ahinana-ngge, ka nangindi-wa nggjounga Jezu, ka na-mandi'i-ni panuka puata panewe, ne'e pandou Pa-atura Watu pa-hidana, Nggabata hinawe panewe Imbarani. **14** Na lòdo lòdo pa-dinaka-wa, tuma-nawe Paza, wa'i ndjamu ènewe. Ka hinandi ata Jawundi Pilatu: Patjete-kona, zangandi-mi! **15** Tàka akawaro: Kainioo, kaini, wòndawaoo! hida. Nia ka hinandi Pilatu: Enga wònda-kungguni na Zangandi-mu? hina. Kaa walewa hida rato2 kalada: Nda'iki zangandi ekama wàdeka, nduka-kidona zangandi kalada, hida. **16** Nia ka napili-dani Jezu, ngga'i ka wòndawa, ba hina.

### [Lara materia Maròmba Jezu katuku wònda deta](#)

**17** Nia kaa ngindiwa Jezu. Ka nètini Jezu adeito douwa katuku wòndana, hèti pandou angarana Apakoba katowa-na, Nggolonggota hinawe ba panewe Imbarani-kowe. **18** Nia kaa wòndawa ne'e, mòno hida aduada ata eka olena mbjali2, ka na Jezu ne'eni tiluda. **19** Nia ka na Pilatu wa'ingge pa-urata-na, ka nata'i-ngge katuku wònda deta tòduna: Jezu ata Nazareta-wa, Zangandi-na ata Jawundi, hinawe ne pa-urata. **20** Nia ka ne



pa-urata na-luana ata Jawundi atandawe, mala ne pandou pawònda wa'i-dani Jezu ba mbàra wàno-dowé, mòno awaingge panewe Imbarani, panewe Roma mòno panewe Nngarika ne pa-urata. **21** Ka taudawe hida rato2 kalada-da ata Jawundi: Zangandi-na ata Jawundi nda lumu-kangge, tàka Zangandi-nangga ata Jawundi ne Zaua, hina lumungge, hidani Pilatu. **22** Ka nawale-we Pilatu: Ne pa-lèngana pa-urata-nggu, nia baawe, bina. **23** Nia ka hida kazòlondandu baa lèngana pawònda-wa Jezungge kaa deke-nandi kalàmbe-na kaa pa-patawi, wo-wòla ia kazòlondandu, wàte-nawe ne kalàmbe djana. Ne kalàmbe djana nda'iki kòtu bondo-nawe, patònu mbolowe. **24** Nia ka hida wèki douna, ngga'i ka nda taira-kawe, tàka ka tazura-we ba nggàra-kuni andoungge. Ne ba binawe, ngga'i ka na-tonggpla-we ne li'i Zurata: Abiwa bawe-nggandi ngawu wèkinggu mòno azurawe ne kalàmbe-nggu, ahina. Hinawe pata paliida kazòlondandu. **25** Nia ka na inana Jezu, mòno, angu mawine-na inana, mòno na Maria mawine-na Kaliopa mòno Maria Mandalena, ne'endi andende mbàra katuku wòndana Jezu. **26** Ne ba naeta-wa inana Jezu mòno na ana panunga pa-manàwara-na ba nandende mbàrana, ka hinani inana: Ee paina, na anamu, hina. Baa ka hinani na ana panunga, na inamu, hina. **27** Liingge hina-nggenangge, nia ka na ana panunga ka nangindi-wa hèti umana. **28** Baangge ba lènga pànde-nawé Jezu ba na-tonggola mbo-mbolo-wengge, ngga'i ka na-tonggola waiwe li'i-nawe Zurata: Ku-marou-wangga ka hinangge. **29** Wa'ini ne'e ia pandalu ambònuna anggura mawilura, nia kaa ta'ingge lumuta amàngu anggura ma-wilurana lawi tàme, kaa padola-ngge baa paenu-nawe Jezu. **30** Na-kabizuka-ngge Jezu ne anggura ma-wilura-ngge, nia ka: Na-tonggola baawengge, hina. Baa ka na-katongira ka najaa-nawe 'jAma ngauna. **31** Nia ka na lòdo ba lòdo pa-dinaka-wa, ka nètindi ata Jawundi mbàrana Pilatu kaa dèngiwa, ngga'i ka pata-dandi wa'ida mòno ka pamburu-ndi, ka nda enga do-doukandi kamate-da katuku wònda deta lòdo ngau, kède dòmo lòdo kalada-wa na lòdo ngau. **32** Nia ka nètindi hida kazòlondandu kaa pata-dandi wa'ida na aia baa ka na dòmo na aia olena pawònda. **33** Tàka baa duki mbàra Jezungge, baa etawa ba namate baa, nia ka ndaa pata-kinandi wa'ina; **34** nia-kidowe na aia kazòlondandu ka na-ndakura wainawe nòmbu

kalàbeka-na Jezù, ka nangu louzo ra'a mòno we'e. **35** Na ata aetawe nia azàkita baangge, mòno ne pa-zàkita ahina tàka-nawe, mòno napànde-ngge ba abina tàka-nawe patèki-na, ngga'i ne jemi kai pawai-wumi. **36** Mala hida ba hinawi, ngga'i ka na-tonggola-we ne li'i Zurata: Nggazu tàka awa ruwina nda'iki papata-dani-langge, ahina. **37** Mòno wa'i dòmongge li'i Zurata: Enga eta-dodani na pa-ndaku-radalangge ahina.

## Lara tane-dani Jezù

**38** Baangge na Jozepa ata Arimatea, ka nadèngi-wa Pilatu, ngga'i ka ku-pamburu-nawe tanaza-na Jezù, hina. Na Jozepa ana panunga kainani Jezù, tàka naai pa-kabuni oro mandauta-nani ata Jawundi. Nia ka na Pilatu ka na-pakaloko-ni. Baangge ka nètini ka na-pamburu-nawe tanaza-na Jezù. **39** Nia ka na Nikondemu, nàti aduki nggède-kuni Jezuna, ka àme kaini angindi ruto emura pa-pakaula ruto nggaro, tòlu kambulu kiloda. **40** Kaa dekewe ne tanaza-na Jezù kaa pakibo-we, kaa taungge ruto bou mbangi dekungge pata taneda ata Jawundi. **41** Mbàra-nawe ne pandou wònda wa'i-dani Jezù, wa'ingge ambatu kaliwo mòno ne kaliwo dana wa'ingge rate bo'u, ndaa bou ata matepo. **42** Ka ne'e niawe pa-bòndala wa'i-dani Jezù, mala ba lòdo pa-dinaka-nani ata Jawundi, mòno ba pambàra-we ne rate.

## Ba na-patingo wèkina Jezù mbàrana Maria Mandalena

**20:1** Nia ka na lòdo kawunga minggu, kapu nggède ngga-nggaro, ba na-kapòta-pongge, nètini Maria Mandalena rate dana, ka naeta-wa na kàmbaka-na ba na-maleilara baa. **2** Ka ngu nètini amale mbàrana Zimo Petura mòno na aia dòmo ana panunga, na pa-manàwara-na Jezù, ka iùna-dawe: Adeke baawa ata Mjori wali rate dana mòno nda mapànde-kingge ba nggjee bendala nia-dani, hina. **3** Ka nètini Pjetura mòno na ana panunga aia, nia kaa duki rate dana. **4** Ne hida aduada apalolo baa male, tàka na ana panunga aia naulu ba namàle, àti-pongge malewara-na wudi Pjetura, làpata ka naduki ulu rate dana. **5** Tingiru hina djanangge ka

naeta-wi hida kibo baa dâpa ma-bendala, tàka nda natama-ki. **6** Baangge ka naduki muri Zimo Petura, ka natama rate dana, ka naeta-wi hida kibo ba ne'endi a-mabòndala, **7** mòno ne kamba paopi wai kabureta, hètina ane'ena katowa detana, nda naole baandi kibo, tàka na-malulu eka baawe ia pandou. **8** Nia ka na ana panunga ia, aduki ulu rate dana, ka nangu tama, ka naeta-we mòno ka napawai; **9** oro inda pànde-podawe li'i-nawe ne Zurata, ba enga kèdena wali tilu ata mate. **10** Baangge hida ana panunga ka nètindi awali uma. **11** Tàka na Maria ne'eni andende nggjounga mbàra rate, ne'eni angi'o. Ne ba ne'eni angi'ongge ka na-katingira rate dana, **12** ka nangu etawi aduada papalewa a-pawènana akakana, ne'endi amandi'i, na aia tòdu-nani na aia tènnda-nani, pandou ne'e wa'ingge tanaza-na Jezuna. **13** Ka hidani Maria hida papalewa: Ee paina, àpa nia kau ngi'o-wawu? hida. Nia ka taunawe Maria: Oro-nawe baa dekewa ata Moringgu, mòno nda kupànde-kingge baa nggjee bòndala nia-dani, hinandi. **14** Hinangge Maria-nangge nia ka winggiru hina, ka nangu etawa Jesu andende, tàka nda natanda-kiwa ba nia Jesu. **15** Nia ka hina-nawe Jesu: Ee paina, àpa nia kau ngi'o-wawu? Nggàrani pawewa-mu? hina. Nia ka na Maria, oro-nawe ata kandi omawa ba hinawe pa-pangèda-na, ka taunawe: Mori, ba wo'uko angindiwa, utèki-nggawe ba nggjee bòndala nia-muni, ngga'i ka kukako padeke-wa, hina. **16** Nia ka hina-nawe Jesu: Maria! hina. Winggiru ka ngu hina Maria, hinangge ba nawaingge panewe Imbarani: Rabbuni! Ngguru! hinawe. **17** Ka hinangge Jesu: Ndau tère-kangga, mala nda kupène-kipo-wangga mbàrana j'Ama. Tàka ukako-wu hèti mbàrada ole dadinggu: Nètingga apène mbàra Amangu mòno Amami, mbàra Alangu mòno Alami, hina-nggumi ka lumu-dawe. **18** Ka nètini Maria Mandalena ka natèki-dawe hida ana panunga, ba na-patanga dènga baani Mjori mòno ba bina baanandi hida.

### Ba na-patingo wèkina Maròmba Jesu mbàrada ana panunga-na

**19** Ba narawi malengge, na lodo kawunga minggu, ba tèngara matodi-da bina ne'e pandouda ana panunga oro mandauta-dandi ata Jawundi, ka ngu àmeni Jesu andinda-ndindara tiluda: Maringi-kona ka hinandi. **20** Lèngana

pa-hinangge-ngge ka nabowo-dandi Umana mòno ne kalàbékana. Nia ka nandeta-we ateda hida ana panunga ne baa etawa Mjori. **21** Nia ka na-zandèka dòmo ba hinandi Jezu: Maringi-kona. Abina wa'ina 'jAma ba na-patuka-ngga Zaua, lunggu wa'i kaina ba ku-patuka-nggumi jèmi, hina. **22** J-èngana pa-hinangge, ka napowi-wi: Djeimbawa Ngjau Matua ka hina waidawe. **23** Ba nggàra-kuni pataunda-mi zalana engà taunda-nawe, ba nggàrakuni pa-padeito-mi zalana engà padeito-nawe, bina.

### Ba na-patingo wèkina mbàrana Tjoma

**24** Nia ka na Tjoma oleda hida akambulu duada, Ndindimu pa-hidana, nda'i-kini mbàrada ba namai Jezu. **25** Nia ka hida wàdeka ana panunga: Maeta baawa Mjori, hida-nawe Tjoma. Tàka na Tjoma: Ba nda kueta-kupuwi oro paku lima detana, mòno hida wòla limanggu ba ndaa padàmi-kupundi oro paku, mòno na limanggu ba nda na-padàmi-kopongge ne kalàbeka-na, nda kupawai pònguki, hina. **26** Wa'i pando-pata lòdo-nawe amalawi, ka ne'e dòmondi hida ana panunga-na, ka na Tjoma wa'i kaini oleda. Ba têngara matodi-da bina ka ngu àmeni Jezu andinda-ndindara tiluda: Maringi-kona, ka hinandi. **27** Ka hina-nawe Tjoma: Joo nggjeendi wòla limarmi, patete-ndi hida limanggu; padola-ni limamu kau padàmi-nggawe ne kalà-beka-nggu, nda kupawai-ki ka nda lumu-kana, tàka ngga'i kau pawaiwu, hina. **28** Ka nawale-we Tjoma: Arou, Mori-nggungge! Ala-nggungge! hina. **29** Nia ka taunawe Jezu: Ba lènga età baamungga, nia kau pawaike. Na-maringi-kona ata apawai làngo ka ndaa eta-kopo, hinani. **30** Nalua dòmo-pundi wàdeka tanda parawi-na Jezu aroda ana panunga-na niangge, panda paaila nèwe zurata dana. **31** Tàka hida ba ailandi, ngga'i kai pawai waina na Jezu ba Karetu-wa na Anana 'jAla, mòno ngga'i ne jèmi kai dou waingge toleka oro wai-minawe ngarana.

### Ba na-patingo wèkina Maròmba Jezu ne'e niri mbònu Timberia

**21:1** Baanangge nia ka na-patingo wèki dòmona Jezu mbàrada ana panunga-na ne'e niri mbònu Timberia! Ka ne hinawe ba na-patingo wèkina.

**2** Ne'e wa'indi Zimo Petura mòno Tjoma, Ndindimu pa-hidana, mòno Njatanela ndou Kjana, tana Nggalilea, mòno hida anana Zambandio, mòno aduada dòmo ana panunga. **3** Pakède-nawe Zimo Petura: Hètingga alaa pa-mandaringo, hinandi. Àti kainggama ne zàme adekunggu, hidani. Nia ka nètindi akalete tena, nia ka ne nggède nda'iki àpa2 pakole-da. **4** Mbòwaku-nawe tanangge ka ngu wa'ini Jezu andende laingo deta. Tàka ndaa tanda-kiwa ana panunga-na ba Nia Jezu. **5** Nia ka natua-wi Jezu: Wa'i panga'a wai zodi nèna mbàrami, ana? hina. Nda'ikioo, hida baa walewa. **6** Nia ka hinandi Jezu: Wjala wa'ingge ne ndaringo-mi ne tutu baie kawana-na tena, enga kolemi ia. Nia kaa wala wa'i tàkangge, nia ka ndaa duka-kingge baa tèngiwe ne ndaringo, oro-nawe ba na-mangeda làngu-tàkawi ia. **7** Nia ka taunawe na ana panunga pa-manàwara-na Jezu: Na Nia-dona Mjori, hina-nawe Pjetura. Ne ba narènge-we Zimo Petura ba Nia Mjori, ka na kalòmbura-ngge ingina, mala ba nda natau-dowe, ka nangu rumba wèkina mbònu dana. **8** Tàka hida wàdeka ana panunga àmendi akalete tena, kaa tèngiwe ne ndaringo ambònuna ia; mala baa ndaa màro-dongge tana mara, wa'i dua ngau kazi'u-kido-nawe. **9** Apène tana marangge kaa ngu etawe mala'a api mòno ia ane'ena pònuna pàngu kambamba. **10** Nia ka hina-dawe Jezu: Ngindipo zodi ia wudi pawòpa-mi, hina. **11** Nia ka na Zimo Petura ka napène tena deta, ka natèngi-we ne ndaringo tana mara; nambònu-ngge ia kalada kalu-lua, ngau lima kambulu touda mbolowa; làngo ka nggaikuwi nda na-marata-kiwe ne ndaringo. **12** Nia ka hina-dawe Jezu: Mjai-wumi kai mana'a, hina. Tàka nda'iki ia hida ana panunga ambani ate patua-wa: Nggàranggu ne Wo'u ahinani, mala ba lènga pànde-dani ba Nia Mjori. **13** Nia ka natuke Jezu ka nadeke-we ne kambamba ka najaa-dawe, baa ka hina kaindi hida ia. **14** Ne niawe pa-katouda wunda wainawe ba na-patingo wèkina Jezu mbàrada ana panunga-na, liingge kède balina wali tilu ata mate.

## Ba na-keketa baliwa Pjetura na Jezu

**15** Abaa panga'a-rigge nia ka na Jezu ka hinani Zimo Petura: Ee Zimo anana Joane, harei-kadòwe ne, manàwara-mungga wudi hida? hina. Nia ka

taunawe Pjetura: Oo Mori, mupànde-dongge ba ku-manàwara-nggu, hinani. Nia ka hina-nawe Jezu: U-karawa nggandi ana mbembenggu, hina.

**16** Baa ka hina dòmo-nawe ne pa-kapàndo wainawe: Ee Zimo, anana Joane, u-manàwara-kadongga? hina. Ka hina-nawe Pjetura: O'o Mori, mupànde-dongga, ba ku-manàwara-nggu, hina. Ka hina-nawe Jezu: Ukandi-nggandi mbembenggu, hina.

**17** Baa ka hina dòmowe pa-katouda wunda wainawe: Ee Zimo, anana Joane, u-manàwara-ngga? hina. Ka ne'eni akalàlu ate dèngangge Pjetura, oro-nawe u-manàwara-ngga? ba hina-nawe ne pa-katouda wunda wainawe. Ka hina-nawe: O'o Mori, ngara tèngakonawe upànde-dongge, upànde-dongga ba ku-manàwara-nggu, hina. Ka hina-nawe Jezu: U-karawa-nggandi mbembenggu.

**18** Lunggu tàkanggu, ne ba bua mane-puwuna, ukète doungge kòmbumu, mòno nètinggu hèti mèli pambei-konawe atemu, tàka bau lèngana pa-kaweda-langge, u-padola-ndi limamu, mòno ata eka akète-ngguwe kòmbumu mòno nangindi-wu hèti nda pa-wukuna pambei-mulangge, hina.

**19** Ne ba hinangge, tèki-nawe ba pei pata matena Pjetura, pa-pamboto dènga wainani 'jAla-langge. Lèngana pa-hinangge-ngge, ka hina-nawe Pjetura: Udeku-ngga, hina.

**20** Winggiru hina Pjetura-ngge ka naeta-wa na ana panunga pa-manàwara-na Jezu ba na-padeku, na a-mawinggira mbàrana Jezu ba mana'a nggède-wena, Mori, nggàrani apazuu-nggu? ahina.

**21** Naeta-wa na ana panunga na Pjetura-ngge, ka hina-nawe Jezu: Mori, peikona name-langge? hina.

**22** Ka taunawe Jezu: Ngga'i ka engani làpata ba àmengga, ba lunggu-kuni, àpa-muwe ne nia? Udeku-ngga ne wo'u, hina.

**23** Niawe nia ka na-kamboka-we ne patèki mbàrada hida apaole dadina, na ana panunga ba nda na-wukuna pamate-kilangge. Tàka nda na-wukuna pamate-ki, inda hina-kiwe patèki-na Jezu, tàka ngga'i ka engani làpata ba àmengga ba lunggu-kuni, àpa-muwe ne nia, niawe.

**24** Nia-dona na ana panunga azàkita-ndi hida ahinana mòno aaila-ndi, mòno tapànde-ngge ne pa-zàkita-na ba ahina pòngu tàka-nawe.

**25** Nalua-pundi wàdeka parawi-na Jezu; ba tulita ia tulita iakuwi, ba ku-pangèda-ngge ne tana kaiko nda natutu-Jeiwe ba naboti-wi zurata pa-tulita.